

摘藻堂四庫全書薈要

子部

欽定四庫全書薈要

子部  
御定淵鑑類函卷三百一

詳校官兵部主事臣雷純




欽定四庫全書薈要卷一萬一千七百四十九

子部

御定淵鑑類函卷三百一

人部六十別

別五上

  
原詩晉張華祖道征西應詔詩曰赫赫大晉奄有萬方

陶以仁化曜以天光貳跡陝西實在我王內任玉鉉外  
惟鷹揚四牡揚鑣元輅振綏庶寮羣后餞飲洛湄感離  
歎悽慕德遲遲 又祖道趙王應詔詩曰於顯穆親時

惟我王稟姿自然金質玉相光宅舊趙作鎮冀方休寵  
曲錫備物煥彰發軔上京出自天邑百寮餞行縉紳具  
集軒冕峩峩冠蓋習習戀德惟懷永歎弗及 何敬祖

洛水祖王公應詔詩曰穆穆聖王體此慈仁友于之至  
通于明神遊宴綢繆情戀所親薄言餞之于洛之濱嵩  
崖巖巖洪流湯湯春風動衿歸鴈和鳴我后饗客鼓瑟  
吹笙舉爵惟別聞樂傷情嘉宴既終白日西歸羣司告  
旋鸞輿整綏我皇重離頓轡驂駢臨川永歎酸涕霑頤

崇恩感物左右同悲 王濬祖道應令詩曰侯誰在矣

東宮誥誥曰保曰傅弘道惟新前疑協衡顧問翼輪豈  
伊張仲專美前津渙乎唐德欽在四鄰齊軌上葉永垂  
清塵 陸雲餞太尉王公還京邑詩曰聖澤既渥嘉會

悒悒庭旅鐘鼓堂有瑟琴飛轡清暉扶桑移陰視景祇  
慕揮袂霑襟戀彼同棲悲爾異林我有旨酒以歌以吟  
潘岳北芒送別王世胄詩曰朱鑣既揚四轡既整駕  
言餞行告離芒嶺情有遷延日無餘影迴轅南翔心焉

北騁 孫楚答弘農故吏民詩曰昔我先侯邁德垂化

康哉之詠實由是佐惟余忝辱弗克負荷每歷貴邦仰  
瞻泰華追慕先軌感想哀嗟詵詵故臣爰及羣士皓首  
老成率彼邑里闡崇高義長幼以齒 宋顏延之為皇

太子侍宴餞衡陽南平二王應詔詩曰太儀在御皇聖  
居貞旁緝民紀仰緯天經物資感變神以瑞形川無遁  
寶山不閔靈亦既戒裝皇心載遠夕帳亭臯晨儀禁苑  
神行景騫發自靈閭對宴感分瞻秋悼晚 梁王筠侍

宴餞臨川王北伐應詔詩曰金版韜英玉牒蘊精帝德  
乃武王威有征軒習弧矢夏陳干戚周驚戎車漢馳羽  
檄我皇俊聖千年踵武德洞十門威加八柱金正圮德  
水行失道胡馬南牧戎徒西保薦食伊瀍整居豐鎬金  
闕揚塵銅臺茂草命彼膳夫爰詔協律樂賦出車弦操  
吉日玉饌駢羅瓊漿泛溢聖德溫溫賓儀秩秩

原古詩曰行行重行行與君生別離相去萬餘里各在  
天一涯道路阻且長會面安可知胡馬依北風越鳥巢

南枝相去日已遠衣帶日已緩浮雲蔽白日遊子不顧  
反思君令人老歲月忽已晚棄捐勿復道努力加餐飯  
又曰明月何皎皎照我羅牀帷憂愁不能寐攬衣起  
徘徊客行雖云樂不如早旋歸 又曰涉江采芙蓉蘭

澤多芳草採之欲遺誰所思在遠道還顧望舊鄉長路  
漫浩浩同心而離居憂傷以終老 又曰庭中有奇樹

綠葉發華滋攀條折其榮將以遺所思馨香盈懷袖路  
遠莫致之此物何足貴但感別經時 漢李陵贈蘇武



別詩曰晨風鳴北林熠燿東南飛願言所相思日暮不  
垂帷明月照高樓想見餘光輝玄鳥夜過庭髣髴能復  
飛褰裳路踟躕彷徨不能歸浮雲日千里安知我心悲  
思得瓊樹枝以解長渴饑 又贈蘇武別詩曰良時不  
再至離別在須臾屏營衢路側執手野踟躕仰視浮雲  
馳奄忽交相踰風波一失所各在天一隅長當從此別  
且復立斯須欲因晨風發送子以賤軀 又贈蘇武別  
詩曰嘉會難再遇三載為千秋臨河濯長纓念子悵悠

悠遠望悲風至對酒不能酬行人懷往路何以慰我愁

獨有盈觴酒與子結綢繆 又贈蘇武詩曰攜手上河

梁遊子暮何之徘徊歧路側悵悵不能辭行人難久留

各言長相思安知非日月弦望自有時努力崇明德皓

首以為期 又贈蘇武別詩曰陟彼南山隅送子淇水

陽爾行西南遊我獨東北翔轅馬顧悲鳴五步一彷徨

雙鳧相背飛相違日已長遠望雲中路想見來珪璋萬

里遙相思何益心獨傷隨時愛景曜願言莫相忘 又

贈蘇武詩曰爍爍三星列拳拳月初生寒涼應節至蟋蟀夜悲鳴晨風動喬木枝葉日夜零遊子暮歸思塞耳不能聽遠望正蕭條百里無人聲遠處天一隅苦困獨零丁親人隨風散瀝滴如流星願得萱草枝以解飢渴情 又贈蘇武別詩曰鍾子歌南音仲尼歎歸歟戎馬悲邊鳴遊子戀故廬陽鳥歸飛雲蛟龍樂潛居人生一世間貴與願同俱身無四凶罪何為天一隅與其苦筋力必欲榮薄軀不如及清時策名於天衢 蘇武別李

陵詩曰骨肉緣枝葉結交亦相因四海皆兄弟誰為行

路人况我連枝樹與子同一身昔為鴛與鳶今為參與

辰昔在常相近邈若胡與秦惟念當離別思情日已新

鹿鳴思野草可以喻嘉賓我有一樽酒欲以贈遠人願

子留斟酌慰我平生親 又別李陵詩曰雙鳧俱北飛

一鳧獨南翔子當留斯館我當歸故鄉一別如秦胡會

見何詎央愴恨切中懷不覺淚霑裳願子長努力言笑

莫相忘 又別李陵詩曰征夫懷往路起視夜何其參

辰皆已沒去去從此辭行役在戰場相見未有期握手  
一長歎淚為生別滋努力愛春華莫忘歡樂時生當復  
來歸死當長相思 又蘇武詩曰黃鵠一遠別千里顧  
徘徊胡馬失其羣思心常依依何況雙飛龍羽翼臨當  
乖幸有絃歌曲可以喻中懷請為遊子吟泠泠一何悲  
絲竹厲清聲慷慨有餘哀長歌正激烈中心愴以摧欲  
展清商曲念子不能歸俛仰內傷心淚下不可揮願為  
雙黃鵠送子俱遠飛 魏曹植詩曰門有萬里客問君

何鄉人褰裳起從之果得心所親挽裳對我泣太息前  
自陳本是朔方士今為吳越民行行將復行去去適西

秦 又詩曰微陰翳陽景清風飄我衣遊魚潛綠水翔

鳥薄天飛眇眇客行士徭役不得歸始出嚴霜結今來

白露晞遊子歎黍離處者歌式微慷慨對嘉賓悽愴內

傷悲 又送應氏詩曰願得展嬾婉我友之朔方親昵

竝集送置酒此河陽山川迥且遠別促會日長 應瑒

別詩曰朝雲浮四海日暮歸故山行役還舊土悲思不

能言悠悠涉千里未知何時旋 又別詩曰浩浩長河

水九折東北流晨夜赴滄海海流亦何抽遠適萬里道  
歸來未有由臨河累太息五內懷傷憂 晉王浚從幸

洛水餞王公歸國詩曰聖主應期運至德敷彝倫神道  
垂大教元化被無垠欽若崇古制建侯屏四鄰皇輿迴  
羽蓋高會洛水濱臨川講妙藝縱酒釣潛鱗八音以迭  
奏蘭羞備時珍古人亦有言為國不思貧與蒙廟庭施  
幸得側大鈞羣僚荷恩澤朱顏感獻春賦詩盡下情至

感暢人神長流無舍逝白日入西津奉辭慕華輦侍衛  
路無因馳情繫帷幄乃心戀軌塵 陸機祖道畢雍孫

劉邊仲潘正叔詩曰皇儲延髦俊多士出幽遐適遂時  
來運與子遊承華執笏崇賢內振纓曾城阿畢劉贊文  
武潘生蒞邦家感別懷遠人願言歎以嗟 又送顧公

直詩曰伐鼓五嶺表揚聲萬里外高山何足陵巨海猶  
縈帶 又擬庭中有奇樹詩曰芳草忽已茂佳人竟不  
歸感物戀所歡採此當遺誰 潘岳金谷集詩曰王生



和鼎實石子鎮海沂親友各言邁中心悵有違何以叙  
離思攜手遊郊畿朝發晉京陽夕次金谷湄回谿縈曲  
阻峻坂路威夷淶池泛淡淡青柳何依依元醴染朱顏  
但訴杯行遲投分寄石友白首同所歸 潘尼送盧弋  
陽景宣詩曰楊朱馬所哭岐路重別離屈原何傷悲生  
離情獨哀知命雖無憂倉卒意低迴歎氣從中發灑淚  
隨襟頰九重不常鍵閭闔有時開愧無紵衣獻貽言取  
諸懷 又皇太子集應令詩曰聖朝命方岳爪牙司北

鄰皇儲延篤愛設餞送遠賓誰應今日宴具惟廊廟臣

置酒宣猷庭擊鼓靈沼濱羽觴飛醴醑芳饌備奇珍巴

渝二八奏妙舞鼓鐸振長袂生迴風曲裾揚輕塵 孫

楚征西官屬於陟陽候祖道送別詩曰晨風飄岐路零

雨被秋草傾城遠相送餞我千里道乖離卽長衢惆悵

盈懷抱孰能察其心鑒之以蒼昊 左貴嬪感離詩曰

自我去膝下倏忽踰再期邈邈浸彌遠拜奉將何時披

省所賜告情玩悼離詞髣髴想容儀歔歔不自持何時

當奉面娛目於書詩何以訴辛苦告情於文辭 殷仲

文送東陽太守詩曰昔人深誠歎臨水送將離如何祖

良遊心事孱在斯虛亭無留賓東川緬逶迤 宋孝武

與廬陵王紹別詩曰連歲矜離心今茲幸良集信宿窮

晨暮開顏披所戢未盡歡晤懷已傷岐路及舳艫引江

介飛旌背爾邑悄擾徒旅戒團欒流景入遲遲分手念

泣泣登路泣 南平王代收淚就長路詩曰聳轡高陵

曲揮袂廣川瀆黃塵昏白日悲風起浮雲蕭條萬里別

契闊三秋分時往從朝露年來驚夕氲徘徊去芳節依

遲從遠軍 謝靈運相送方山詩曰祇役出皇邑相期

息甌越解纜及流潮懷舊不能發析析就衰林皎皎明

秋月含情易為盈遇物難可歇 謝惠連與孔曲阿別

詩曰悽悽乘蘭秋言餞千里舟塗屆雲陽邑邑宰有昔

遊行人雖念路為爾暫淹留 又夜集歎乖詩曰詩人

詠踟躕搔首歌離別誠哉曩日歡展矣今夕切吾生赴

遙令質明即行轍在貧故宜言贈子保温惠曷用書諸

紳久要亮有誓 鮑照詩曰輕鴻戲江潭孤鴈集洲汜

邂逅兩相親同念共無已風雨好東西一隅頓千里追  
憶棲宿時聲容滿心耳揚翮不能翔徘徊煙霧裏 又

送盛侍郎詩曰北臨出塞道南望入鄉津高墉宿寒霧

平野起秋塵 齊王儉後園餞從兄豫章詩曰茲夕竟

何夕念別開曾軒光風轉蘭蕙流月汎虛園 王融奉

辭鎮西應教詩曰末學謝能筭高義幸知遊雷庭參辯  
爽梁苑豫才鄒徘徊歲光晚搖落江樹秋風旗繁別浦

霜瑄迺遙州

又蕭諮議西上夜集詩曰徘徊將所憂

惜別在河梁衿袖三春隔江山千里長寸心無遠近邊

地有風霜勉哉勤歲暮敬矣慎容光山中殊未懌杜若

空自芳 謝朓別王僧孺詩曰花樹雜為錦月池皎如

練如何當此時別離言與宴非君不見思所悲思不見

又與江水曹詩曰山中上方月故人清樽賞遠山翠

百重迴流映千丈花枝聚如雪垂藤散猶網別後能相

思何嗟異風壤 又離夜詩曰玉繩隱高樹斜漢映曾

臺離堂華燭盡別幌清琴哀翻潮尚知恨客思眇難裁  
山川不可夢况乃故人杯 又將發石頭上烽火樓詩  
曰徘徊戀皇邑躑躅躡魯阿陵高墀闕近眺迴風雲多  
荆吳阻山岫江海合瀾波歸飛無羽翼其如離別何

又新亭渚別范雲詩曰洞庭張樂地瀟湘帝子遊雲去  
蒼梧野水還江漢流停驂我悵望輟棹子夷猶廣平聽  
方籍茂陵將見求心事俱已矣江上徒離憂 虞羲送  
友人上湘詩曰濡足送征人褰裳臨水路共盈一樽酒

對之愁日暮漢廣雖容舸風悲未可渡佳期難再得願

但論心故沅水日生波芳洲行墜露共知丘壑改同無

金石固 劉繪送別詩曰春蒲方解穉弱柳向低風相

思將安寄悵望南飛鴻 張融別詩曰白雲山上盡清

風松下歇欲識離人悲孤臺見明月 梁昭明春日宴

晉熙王詩曰百六鍾期數三七厄時中國難悲如燬親

離歡數窮藩哲遊沮夢揚化撫邊戎幸茲同宴醕引滿

愛樽空 簡文帝餞廬陵內史王修應令詩曰餞行臨



上節開筵命羽觴迴池瀉飛棟濃雲垂畫堂疎槐未合  
影仄日暫流光園梅斂新豔階蕙結初芳 又餞別詩

曰行樂出南皮宴餞臨華池擗解篁開節花閣鳥迷枝  
窗陰隨影度水色帶風移徒命銜杯酒終成憫別離

又送別詩曰行行異沂海依依別路岐水苔隨纜聚岸  
柳拂舟垂石茵生懸葉江槎流卧枝燭盡悲宵去酒滿  
惜將離 沈約侍宴謝朓宅餞東歸應詔詩曰皇情悵

東舳羽旆拂南屨夏雲清朝景秋風揚早蟬飲和陪下

席論道光上筵 又侍宴樂遊苑餞徐州刺史應詔詩

曰沃若動龍驂參差凝鳳管金塘草未合玉池泉將滿

又侍宴樂遊苑餞呂僧珍應詔詩曰丹浦非樂戰負

重切君臨我皇蘊至德忘已用堯心愍茲區宇內魚鳥

失飛沈推轂二嶠道揚旆九河陰超乘盡三屬選士皆

百金戎車出細柳餞席遵上林命師誅後服授律緩前

禽函轅方解帶曉武稍披衿伐罪芒山曲弔民伊水潯

將陪告成禮待此未抽簪 又別范安成詩曰平生少

年日分手易前期及爾同衰暮非復別離時勿言一樽  
酒明日難共持夢中不識路何以慰相思 又送友人  
別詩曰君東我亦西銜悲涕如霰浮雲一南北何由展  
言宴方作異鄉人贈子同心扇遙裔發海鴻連翩出蒼  
燕春秋更去來參差不相見 又別謝文學詩曰漢池  
水如帶巫山雲似蓋一望沮漳水寧思江海會以我徑  
寸心送君千里外 丘遲侍宴樂遊苑餞徐州刺史應  
詔詩曰詰旦閭闔開馳道聞鳳吹輕葦承玉輦細草藉

龍騎風遲山尚響雨息雲猶漬巢空初鳥飛荇亂新魚

戲寔惟北門重匪親孰為寄參差別念舉肅穆恩波被

小臣信多幸投生豈酬義 范雲之零陵郡次新亭詩

曰江干遠樹浮天末孤煙起江天自如合煙樹還相似

滄流未可源高飄去何已 又別詩曰洛陽城東西長

作經時別昔去雪如花今來花似雪 又送沈記室夜

別詩曰桂水澄夜氛楚山清曉雲秋風兩鄉怨秋月千

里分寒芝寧共採霜猿行獨聞捫蘿正憶我折桂方思

君 又別詩曰孤煙起新豐候鴈出雲中草低金城霧  
木下玉門風別君河初滿思君月屢空折桂衡山北摘  
蘭沅水東蘭摘心焉寄桂折意誰通 江淹貽袁常侍

詩曰昔我別楚水秋月麗秋天今君客吳坂春日媚春  
泉幽冀生碧草沅湘含翠煙鑠鑠霞上景懜懜雲外山  
涉江竟何望留滯空採蓮 又臨秋怨別詩曰四時煎  
日夜玉露催紫榮始懷未及歎春意秋方驚涼草散螢  
色衰樹斂蟬聲承君客江潭先愁鴻鴈鳴吳山饒離袂

楚水多別情金碧堅不滅桂華蘭有英但見一葉落哀

恨方未平

又擬古雜體詩曰遠與君別者乃至鴈門

關黃雲蔽千里遊子何時還送君如昨日簷前露已團  
不惜蕙草晚所悲道里寒君行在天涯妾身長別離願  
一見顏色不異瓊樹枝菟絲及水萍所寄終不移 任

昉詩曰離燭有窮輝別念無終緒岐言未及申離目已  
先舉揆景巫衡阿臨風長楸渚浮雲難嗣音徘徊悵誰  
與儻有關外驛聊訪狎鷗渚 王僧孺送殷何兩記室

詩曰掩袖出南浦驅車送上征飄飄曉雲駛漾漾旦潮

平不肖余何惜無貲是勿輕儻有還書便一言訪死生

庾肩吾侍宴餞湘東王詩曰陳王從遊士高宴入承

華並載同連璧雕文類簡沙落後時動樹墜雪暫揺花

念此離筵促方愁別路賒又侍宴餞湘州刺史張續

詩曰洞庭資善政層城送遠離九歌揚妙曲八桂動芳

枝雨足飛春殿雲峯入夏池郢路方遼遠湘山轉蔽虧

何當好風日極望長沙垂又餞張孝總應令詩曰層

臺臨迴漲耿耿青煙上欲送分符人翻似河隄望寒雲  
暗積水秋雨蒙重嶂別念動神衿華文切離貺慙無寡  
和曲空陪郢中唱 又應令詩曰江上早寒生蕭條饒  
管清別筵開帳殿離舟卷幔城前山黃葉起對岸白沙  
驚臨渦同極望竊吹愧才輕 又侍宴餞東陽太守范  
子雲詩曰東部資良守北宮敦獻酬新枝漸接樹故凍  
欲含流早花少餘雪春寒極晚秋徒嗟白岸遠空想赤  
松遊 又新林送劉之遴詩曰旆轉黃山路舟纒白馬



津送輪時合憶分驂各背塵常山喜臨代隴頭悲望秦  
欲持漢中策還以贈征人 朱超道別席中兵詩曰數  
年共遊息一旦各聯翩莫論行近遠終是隔山川長波  
漫不極高岫鬱相連急風亂還鳥輕寒靜暮蟬扁舟已  
入浪孤帆漸逼天停車對空渚長望轉依然 吳均送  
呂外兵詩曰白雲浮海際明月落河濱送君長歎息徒  
使淚霑巾 又別夏侯故章詩曰白馬黃金羈青驪紫  
絲鞵新知關山別故人河梁送置此一函書為余達雲

夢 又酬別詩曰故人杯酒別天清明月亮露下寒葭

中風起秋江上衣染潺湲淚棹犯參差浪七首直千金

七寶雕葉狀生離何用表賴此持相餉 又別王謙詩

曰嚴光不遂世流轉任飛蓬欲還天台嶺不狎甘泉宮

離歌玉絃絕別酒金卮空儻遺故人念僕在東山東

又贈姚郎詩曰星漢正參差佳人不在斯宿昔暫乖阻

何異遠分離露染蘼蕪葉日照茱蘭枝風光已飄薄雲

采復逶迤勞夢無人覺默默心自知 又贈別詩曰客

子慘無歡送別江之干白雲方眇眇黃鳥尚關關  
糾紛巫山石合沓洞庭瀾行衣侵曉露征舸犯夜湍  
無因停合浦見此去珠還 又贈別詩曰樹響浹山來  
猿聲繞岫急旅帆風飄揚行巾露霑濕深浪閣蒹葭  
濃雲沒城邑不見別離人獨有相思泣 又贈別詩曰  
君留朱門裏我至廣江濱城高望猶見風多聽不聞  
流蘋方繞繞落葉尚紛紛無由得共賞山川間白雲  
何遜與胡興安夜別詩曰居人行轉軾客子暫維舟  
念此一言笑分

為兩地愁露濕寒塘草月映清淮流方抱新離悵獨守

故園秋 又從鎮江州與遊故別詩曰歷稔共追遊一

旦辭羣匹復如東流水未有西歸日夜雨滴空階曉燈

暗離室相悲各罷酒何時更促膝 蕭琛別詩曰落日

總行轡薄別在江干遊客無淹期晨川有急瀾分手信

云易相思誠獨難之子兩特達伊余日盤桓俟我式微

歲共賞階前蘭 蕭子範侍宴餞陸倕應令詩曰儲皇

餞離送廣命傳羽觴侍遊追曲水閑宴等清漳新泉已

激浪初奔始含芳雨罷葉增綠日斜樹影長 劉孝綽

侍宴餞庾於陵應詔詩曰皇心眷將遠悵餞靈芝側是  
日青春獻林塘多秀色芳草疑綸組嘉樹似雕飾遊絲  
綴鶯領光風送綺翼下輦朝既盈留宴景將昃高辯競  
談端竒文爭筆力伊臣獨無伎何由奉吹息 又侍宴  
餞張惠紹應詔詩曰滄池誠自廣蓬山一何峻麗景花  
上鮮油雲葉裊潤風度餘芳滿鳥集新條振餞言班俊  
造光私獎輜舛徒然謬反隅何以窺重仞 又侍離宴

詩曰輾轅東北望江漢西南永羽旗映日移鏡吹臨風  
警令王愍追送纚舟餞俄頃掩袂望征雲銜杯惜餘景  
首燕徒有心局步何由騁 又應令詩曰鮮雲積上月  
凍雨晦初陽迴風飄淑氣落景換新光竹萌始防露桂  
挺已含芳瑶堦變杜若玉沼發攢蔣聖衿惜岐路曲宴  
關蘭堂 又江津寄劉之遴詩曰與子如黃鵠將別復  
徘徊經過一柱觀出入三休臺共摘雲氣藻同舉霞文  
杯佳人每曉遊禁門恒晚開欲寄一言別高駕何由來

宗夫詩曰別酒正參差乖情將陸離悵焉臨桂苑愍  
默瞻華池輕雲流惠采時雨亂清漪眇眇追蘭徑悠悠  
結芳枝眷言終何託心寄方在斯 劉顯發新林浦贈  
同省詩曰迴首望歸途山川邈離異落日懸秋浦歸鳥  
飛相次感物傷我情惆悵懷親懿 劉孺侍宴餞新安  
太守蕭幾應令詩曰芝殿延薄景畫室寫油雲玄覽多  
該洽聖思究前聞微密探精義優游妙典墳飲餞參多  
士贈言賦新文 張績侍宴餞東陽太守蕭子雲詩曰

仲月發初陽輕寒帶春序淶池解餘凍丹霞霽新雨良  
守謁承明徂舟戒蘭渚皇儲惜將邁金樽留宴醕 周

王褒入關故人送別詩曰百年餘古樹千里閭黃塵關  
山行就近相看成遠人 又別陸才子詩曰解纜出南

浦征棹且凌晨還看分手處惟餘送別人中流搖蓋影  
邊江落騎塵平湖開曙日細柳發新春滄波不可望行  
雲聊共因 又別王都官詩曰連翩憫流水悽愴惜離  
羣東西御溝水南北會稽雲河橋兩堤絕橫岐數路分



山川遙不見懷袖遠相聞 庾信應令詩曰望別非新  
館開舟即舊灣浦喧征棹發亭空送客還路塵猶向水  
征帆獨背關 又和保法師詩曰秦關望楚路灞岸想  
江潭幾人應落淚看君馬向南 又和侃法師詩曰客  
遊經歲月羈旅故情多近學衡陽鴈秋分俱度河 又  
和侃法師詩曰迴首河隄望眷眷嗟離絕誰言舊國人  
到在他鄉別 又寄王琳詩曰玉關道路遠金陵信使  
疎獨下千行淚開君萬里書 又別周弘正詩曰扶風

石橋北函谷故關前此中一分手相逢知幾年黃鵠一

反顧徘徊戀愴然自知悲不已徒勞減瑟絃 陳周弘

正隴頭送征客詩曰朝霜侵漠草流沙度隴飛一聞流  
水曲行住兩霑衣 又答林法師詩曰客行七十歲歲

暮遠徂征寒雲結不解隴水凍無聲君看日近遠為憶

長安城 徐陵新亭送別應令詩曰鳳吹臨伊水時駕

出河梁野燎村田黑江秋岸荻黃隔城聞上鼓迴洲隱  
去檣神襟愛遠別流睇極清漳 又別毛永嘉詩曰願

子厲清規歸來振羽儀嗟余今老病此別恐長離白馬  
君來哭黃泉我詎知徒勞脫寶劍空掛隴頭枝 張正  
見征虜亭送新安王應令詩曰鳳吹臨南浦神駕餞東  
平亭迴漳水乘旆轉洛濱笙地凍班輪響風嚴羽蓋輕  
燒田雲色暗古樹雪花明岐路一回首流襟動眷情

又秋日別庾正負詩曰征途愁轉旆連騎慘停鑣朔氣  
凌疎木江風送上潮青雀離帆遠朱鳶別路遙唯有當  
秋月夜夜上河橋 陰鏗送始興王詩曰良守別承明

枉道暫逢迎去帆收錦纜歸騎指蘭城紛紜連山暗潺

湲派水清桂晚花方白蓮秋葉始輕背飛傷客念臨岐

憫聖情分風不得遠何由送上征 又江津送劉光祿

不及詩曰依然臨送渚長望倚河津鼓聲隨聽絕帆勢

與雲鄰泊處空餘鳥離亭已散人林寒正下葉釣晚欲

收綸如何相背遠江漢與城闔 又廣陵岸送北使詩

曰行人引去節送客艤歸艫即是觀濤處仍為郊贈衢

汀洲浪已息邗江路不紆亭嘶背櫪馬檣轉向風烏海

上春雲雜天際晚帆孤離舟對零雨別渚望飛鳧定知  
能下淚非但一楊朱 江總別袁昌州詩曰河梁望隴

頭分手路悠悠徂年驚若電別日欲成秋黃鵠飛飛遠  
青山去去愁不言雲雨散更似東西流 又賦得攜手

上河梁應詔詩曰早秋天氣涼分手關山長雲愁數處  
黑木落幾枝黃鳥歸猶識路流去不知鄉秦川心斷絕  
何悟是河梁 又別袁昌州詩曰客子歎途窮此別異

西東關山嗟墜葉岐路憫征蓬別鶴聲聲遠愁雲處處

同 又別賓化侯詩曰分岐泣世道念別傷邊秋斷山

時結霧平海若無流驚鷺一羣起哀猿數處愁是日送

歸客為情自可求 又別永新侯詩曰送君張掖郡分

悲函谷關欲知腸斷絕浮雲去不還 增唐沈佺期古

別詩曰白水東悠悠中有西行舟舟行有返櫂水去無

還流奈何生別者戚戚懷遠遊自君闕芳躡青陽四五

道皓月掩蘭室光風虛蕙樓相思無明晦長歎累春秋

離居久遲暮高駕何淹留 陳子昂送客詩曰故人洞

庭去楊柳春風生相送河洲晚蒼茫別思盈白蘋已堪  
把綠芷復含榮江南多桂樹歸客贈平生 李白金鄉  
送韋八之西京詩曰客自長安來還歸長安去狂風吹  
我心西掛咸陽樹此情不可道此別何時遇望望不見  
君連山起烟霧 又贈別王山人歸布山詩曰王子析  
道論微言破秋毛還歸布山隱興入雲天高爾去安可  
遲瑤草恐衰歇我心亦懷歸屢夢松上月 杜甫新婚  
別詩曰兔絲附蓬麻引蔓故不長嫁女與征夫不如棄

路旁結髮為妻子，席不暖君牀。暮婚晨告別，無乃太匆  
忙。君行雖不遠，守邊赴河陽。妾身未分明，何以拜姑嫜。  
誓欲隨君去，形勢反蒼黃。勿為新婚念，努力事戎行人。  
事多錯迕，與君永相望。又垂老別詩曰：四郊未寧靜，  
垂老不得安。子孫陣亡盡，馬用身獨完。投杖出門去，同  
行為辛酸。幸有牙齒存，所悲骨髓乾。男兒既介冑，長揖  
別上官。老妻卧路啼，歲暮衣裳單。孰知是死別，且復傷  
其寒。此去必不歸，還聞勸加餐。棄絕蓬室居，塌然摧肺



肝 又無家別詩曰寂寞天寶後園廬但蒿藜我里百  
餘家世亂各東西存者無消息死者為塵泥賤子因陣  
敗歸來尋舊蹊久行見空巷日瘦氣慘悽縣吏知我至  
召令習鼓鞀永痛長病母五年委溝溪生我不得力終  
身兩酸嘶人生無家別何以為蒸黎 又夢李白詩曰  
死別已吞聲生別常惻惻江南瘴癘地逐客無消息故  
人入我夢明我常相憶恐非平生魂路遠不可測魂來  
楓林青魂返關塞黑君今在羅網何以有羽翼落月滿

屋梁猶疑照顏色水深波浪闊無使蛟龍得 王維送

別詩曰下馬飲君酒問君何所之君言不得意歸卧南

山陞但去莫復問白雲無盡時 又齊州送祖三詩曰

相逢方一笑相送還成泣祖帳已傷離荒城復愁入天

寒遠山淨日暮長河急解纜君已遙望君猶佇立 又

觀別者詩曰青青楊柳陌陌上別離人愛子遊燕趙高

堂有老親不行無可養行去百憂新切切委兄弟依依

向四鄰都門帳飲畢從此謝親賓余亦辭家者看之淚

滿中 常建送李十一尉臨溪詩曰泠泠花下琴君唱

渡江吟天際一帆影預懸離別心言念神仙尉因致瑤  
華音回軫撫商調越溪澄碧林 錢起酬王維春夜竹

亭贈別詩曰山月隨客來主人興不淺今宵竹林下惟  
覺花源遠惆悵曙鶯啼孤雲還絕巘 韋應物送李儋

詩曰別離何處生乃在親愛中反念行路子拂衣自西  
東日昃不留宴嚴車出崇墉行遊非所樂端憂道未通  
春野百卉發清川思無窮歸當掩重關默默想音容

王縉古別離詩曰下階欲離別相對映蘭叢含辭未及

吐淚落蘭叢中高堂靜秋日羅衣飄暮風誰能待明月

迴首見牀空 孟雲卿古別離詩曰朝日上高堂離人

怨秋草但見萬里天不見萬里道君行本遙遠苦樂良

難保宿昔夢同衾憂心常傾倒含酸欲誰訴展轉傷懷

抱結髮年已遲征行去何早少壯無會期水深風浩浩

孟郊古怨別詩曰颯颯秋風生愁人怨離別含情兩

相向欲語氣先咽心曲千萬端悲來却難說別後唯所

思天涯共明月 許渾汾上燕別詩曰雲物如故鄉山

川知異路年來未歸客馬上春欲暮一樽花下酒落日

水西樹不待管絃終搖鞭背花去 宋梅堯臣與蔣秘

別二十六年田棐二十年羅拯十年始見之詩曰我今

五十二嘗苦離別煎屈指數離別正去一半年三君異

出處相見有後先蔣最會遇早羅倍晚於田仕宦比我

遲官資居我前此亦漫輕量無限歸荒埏所喜笑語同

各驚顏貌遷 陳師道送內詩曰鹿麋顧其子燕雀各

有隨與子為夫婦五年三別離兒女豈不懷母老妹已  
并父子各從母可喜亦可悲關河萬里道子去當何歸  
三歲不可道白首以為期吞聲不敢盡欲怨當歸誰

歐陽修別後寄聖俞詩曰長河秋雨多夜插寒潮入歲  
暮孤舟遲客心飛鳥急離合二十年乖睽多聚集常時  
飲酒別今別輒飲泣君曰我老矣不覺兩袖濕我年雖  
少君白髮已揖揖憶初京北門送我馬暫立自茲遭檻  
穽一落誰引汲但令身尚在果得手重執歡言正喧譁

別意忽於邑日暮北亭上濁醪聊共挹輕橈動翩翩晚  
水明熠熠行心去雖迫訣語出猶澁歎吁偶成篇聊用  
綴君什 黃庭堅贈別李端叔詩曰我觀江南山如目  
不受垢憶食江南薇子獨於我厚在北思江山如懷冰  
雪顏千峰上雲雨岑絕何由攀白玉著石中與物太落  
落涇渭相將流世不名清濁我行風雨夜船窗聞遠雞  
故人不可見故人心可知 陸游送子龍赴吉州掾詩  
曰我老汝遠行知汝非得已駕言當送汝揮涕不能止

人誰樂離別坐貧至於此汝為吉州吏但飲吉州水一  
錢亦分明誰能肆讒毀我食自可營勿用念甘旨益公  
名位重凜若喬嶽峙汝以通家故或許望燕几得見已  
足榮切勿有所啟又若楊誠齋清介世莫比汝但問起  
居餘事勿挂齒汝去三年歸我儻未即死江中有鯉魚  
頻寄書一紙 王十朋留別太學同舍詩曰二年客函  
關傾蓋皆故人况我同舍郎何異手足親齏鹽共牢落  
燈火同悲辛坐覺歲月忘所賴朋友仁西風起天末浙



瀝吹江蘋思歸適所願惜別還雪中祖席歌驪駒別腸  
轉車輪離索恐孤陋重來約新春 翁卷思遠客詩曰

涉夏思已深感秋念愈迫思念皆為誰為彼遠行客客  
行曷辰休悵望朝復夕邈邈阻前歡悠悠抱今戚中庭  
一株橘嘉實轉金碧爰意花開時花邊語離析惜此不  
忍餐留之候君摘擬君君未來回腸更如折何當乘夢  
時儻遂微容覲 徐璣漳州別王仲言詩曰百草各有  
種春至不栽培交情重故知豈論才不才相識十年初

再見天之涯共飲一杯酒  
粲若紅顏開人生有此樂  
知復能幾回朔風從何來  
吹發枝上梅天寒日欲暮  
又乃行色催

增魏曹植別友詩曰涼風肅兮  
白露滋木感氣兮條葉  
辭臨淶水兮登重基折秋華  
兮采靈芝尋水歸兮贈所思  
感離隔兮會無期伊鬱悒兮  
情不怡唐王適古別離詩曰  
昔歲驚楊柳高樓悲獨守  
今年芳樹枝孤棲怨別離  
珠簾晝不捲羅幔曉長垂  
苦調琴先覺愁容鏡獨

知頻年鴈去無消息罷却鴛紋何用織夜還羅帳空有  
情春著裙腰自無力青軒桃李落紛紛紫庭蘭蕙日氛  
氲已能憔悴今如此更復含情一待君 李白金陵酒  
肆留別詩曰風吹柳花滿店香吳姬壓酒勸客嘗金陵  
子弟來相送欲行不行各盡觴請君試問東流水別意  
與之誰短長 杜甫惜別行送向卿進奉端午御衣之  
上都詩曰肅宗昔在靈武城指揮猛將收咸京向公泣  
血灑行殿佐佑卿相乾坤平尚書勲業超千古雄鎮荆

州繼吾祖裁縫雲霧成御衣拜跪題封賀端午向卿將

命寸心赤青山落日江湖白卿到朝廷說老翁漂零已

是滄浪客 高適贈別晉處士詩曰有人家住清河源

渡河問我遊梁園手持道經注已畢心知內篇口不言

盧門十年見秋草此心惆悵誰能道知己從來不易知

慕君為人與君好別時九月桑葉疎出門千里無行車

愛君且欲君先達今上求賢早上書 白居易生別離

詩曰黃河水白黃雲秋行人河邊相對愁天寒野曠何

處宿棠梨葉戰風颼颼生離別生離別憂從中來無斷

絕憂積心勞血氣衰末年三十生白髮 李頎琴歌送

別詩曰主人有酒歡今夕請奏鳴琴廣陵客月照城頭

烏半飛霜淒高樹風入衣銅鑪華燭燭增輝初彈綠水

後楚妃一聲已動物皆靜四座無言星欲稀清淮奉使

千餘里敢告雲山從此始 王建寄遠曲曰美人別來

無處所巫山月明湘江雨千回相見不分明井底看星

夢中語兩心相對尚難知何況萬里不相疑 張籍送

遠曲曰戲馬臺南山簇簇山邊飲酒歌別曲行人醉後  
起登車席上回尊勸僮僕青天漫漫覆長路遠遊無家  
安得住願君到處自題名他日知君從此去 宋梅堯  
臣醉中留別永叔子履詩曰新霜未落汴水淺輕舸唯  
恐東下遲遶城假得老病馬一步一跛令人疲到君官  
舍欲取別君惜我去頻增喜便步髯奴呼子履又令開  
席羅酒卮烹雞炮兔下筋美盤實飭餽粟與梨蕭蕭細  
雨作寒色厭厭盡醉安可辭六街禁夜猶未去童僕竊

訝吾儕癡但願音塵寄鳥翼慎勿却效兒女悲 歐陽

脩贈別劉原父詩曰憶昨君當使北時我往別君飲君

家愛君小鬟初買得如手未觸新開花歸來不記與君

別酒醒起坐空咨嗟豈知前後不相及歲月忽忽行無

涯客心漸遠誠易感見君雖晚行莫加我後君歸祇十

日君先躍馬未足誇人生每苦勞事役老去尚能憐物

華從今有暇即相過安得載酒長盈車 蘇軾鄭州別

子由詩曰不飲何為醉兀兀此心已逐歸鞍發歸人猶

自念庭闈今我何以慰寂寞登高回首坡隴隔惟見烏  
帽出復沒苦寒念爾衣裘薄獨騎瘦馬踏殘月路人行  
歌居人樂僮僕怪我苦悽惻亦知人生要有別但恐歲  
月去飄忽寒燈相對記疇昔夜雨何時聽蕭瑟君知此  
意不可忘慎勿苦愛高官職 又送陳睦知潭州詩曰  
華清縹緲浮高棟上有纈林藏石甕一杯此地初識君  
千巖夜上同飛鞚君時年少面如玉一飲百觚嫌未痛  
白鹿泉頭山月出寒光潑眼如流汞朝元閣上酒醒時



卧聽風聲鳴鐵鳳舊遊空在人何處二十三年真一夢  
我得生還雪滿髯君亦老嫌金帶重有如社燕與秋鴻  
相逢未穩還相送洞庭青草渺無際天柱紫蓋森欲動  
湖南萬古一長嗟付與騷人發潮弄 楊萬里為丞零

陵代者未至送親攜老幼先歸詩曰吾父先歸吾未可  
吾母已行猶顧我兒女喜歸不解悲我愁安得如兒癡  
牆頭人不須羨居者那知行者歎昨日幸晴今又雨  
天公管得行人苦吾母病肺生怯寒晚風鳴屋止無端

人家養子要作官吾親此行誰使然 又送王監簿民

瞻南歸詩曰潮頭打雲雲不留月波潑窗窗欲流夜寒  
報晴豈待曉天公端為盧溪老盧溪在山不知年盧溪  
出山即日還黃紙苦催得高卧青霞成癖誰能那詔謂  
先生式國人掉頭已復煙林深路傍莫作兩疏看老儒  
不用橐中金 陸游古別離詩曰孤城窮巷秋寂寂美  
人停梭夜歎息空園露濕荆棘枝荒溪月照狐狸迹憶  
君去時兒在腹走如黃犢爺未識紫姑吉語元無據况

憑瓦北占歸日嫁來不省出門前夢魂何因識酒泉粉  
綿磨鏡不忍照女子盛時無十年 元貫雲石別離情

曰吁別離之苦兮蒼梧之野春草青黃陵廟前春水生  
日暮湘裙動輕翠玉樹亭亭染紅淚又聞垓下虞姬泣  
斗帳初驚楚歌畢佳人閣淚弃英雄劒血不銷原草碧  
何物謂之別離情肝腸剝剝如銅聲不如斫其竹剪其  
草免使人生為情老 薩天錫西樓別寄閩憲諸公詩  
曰八月八日溪上別溪上彩旗紅獵獵離情已逐渡江

雲邊草連天剪秋色玉驄金虎諸大夫欲別不別留斯

須沙明淺渚白鳥下酒盡落日青山孤丈夫有淚不須

灑去客掛帆君上馬悠悠回首各東西惟見西溪捕魚

者闌關一片月太行一片雲鴈書遠寄隔山嶽雲飛月

明多憶君 又春別詩曰花氣壓簾愁不埽細雨粼粼

長芳草玉釵燕尾剪春寒坐惜流年鏡中老東風吹柳

人不知春嬌滿眼顰雙眉吳松錦字夢中得曉來月落

聞烏啼南園日暖蝴蝶醉香霧熏人海棠睡朱門小立

蹴金蓮落紅起作離人淚 明李夢陽送大司馬劉大

夏歸東山草堂歌曰東山有草堂縹緲雲嶠孤前對祝  
融峯下瞰巴陵湖明公昔時此堂居麋鹿熊豕當窻趨  
洞庭日落風浪湧倒影射堂堂欲動慘淡誰聞紫芝曲  
獨善不救蒼生哭先帝親裁五色詔老臣曾受三朝祿  
此時邊檄多戰聲曳履謁帝登承明謝安笑却淮淝敵  
魏相坐測單于兵九重移榻數召見夾城日高未下殿  
英謀密語人不知左右微聞至尊羨自從龍去不可攀

公亦卧病思東山湘娥含笑倚竹立山鬼窈窕堂之側  
上書苦死只欲歸聖旨優容意悽惻內府盤螭縷金織  
賜出傾朝皆動色白金之鈿紅票記寶鈔生硬鴉翎黑  
崇文城門水雲白是日觀者塗路塞城中冠蓋盡追送  
塵埃不見長安陌人生富貴豈有極男兒要在能死國  
不爾抽身早亦得君不見漢二疏千載想慕傳畫圖即  
如草堂何處無祿食醜竊胡為乎乃知我公真丈夫嗚  
呼乃知我公真丈夫何景明同崔子送劉以正還關

中詩曰燕川芳草歇已久行子西行更回首駿馬春停

渭曲花金鞭暮指秦中柳看君兄弟皆豪雄十年側想

中丞公東山雲月卧未起北海賓客誰相通荷花初紅

酒初碧汝歸登堂見顏色若問長安舊友生崔何二子

常相憶 楊慎離席行送彭二詩曰吾子從軍巴蜀山

橫戈千里何間關坐使麒麟日月換行收魚鳥風雲閑

文武才名歸一姓兄弟勲華許誰並起晚已謝時運傾

當陽再覩乾坤正陟岡在原來復返海水天風歲將晚

行行白馬燕雪深飛飛黃鵠秦雲遠離堂命酒羽觴疾  
畢昂盈軒月東出主人流連客離席慷慨為子歌今夕

盧柟送友人南還詩曰鳳凰樓外雲氣長青袍白馬  
生輝光送君千里促羽觴鳴箏清歌如故鄉相思明日  
忽分手誰把青驄繫綠楊 俞允文征馬嘶送歸有光

詩曰白楊花飛江水黑江頭行人頭盡白青山日出煙  
塵昏馬上誰為都門客都門豪客長安兒蒲萄百斛柳  
千絲戎裝玉駿邯鄲姬虎旗繡簇紅鴉啼長安三月春



未暮城中不見遊人歸遊人歸醉滿堤青草長征馬嘶

增唐杜甫送賈閣老出汝州詩曰西掖梧桐樹空留一

院陰艱難歸故里去住損春心宮殿青門隔雲山紫邏

深人生五馬貴莫受二毛侵 又送遠詩曰帶甲滿天

地胡為君遠行親朋盡一哭鞍馬去孤城草木歲月晚

關河霜雪侵別離已昨日因見古人情 又贈別何邕

詩曰生死論交地何由見一人悲君隨燕雀薄宦走風

塵綿谷元通漢沱江不向秦五陵花滿眼傳語故鄉春

又江亭王閬州筵餞蕭遂州詩曰離亭非舊國春色  
是他鄉老畏歌聲短愁隨舞曲長二天開寵餞五馬爛  
生光川路風塵接俱宜下鳳凰 祖詠江南旅情詩曰  
楚山不可極歸路但蕭條海色晴看雨江聲夜聽潮劍  
留南斗近書寄北風遙為報空潭橘無媒寄洛橋 劉  
長卿穆陵關北送人歸漁陽詩曰逢君穆陵路匹馬向  
桑乾楚國蒼山古幽州白日寒城池百戰後耆舊幾家  
殘處處蓬蒿徧歸人掩淚看 錢起別張起詩曰有別

時留恨銷魂況在今風濤初振海鷓鷯遠辭林舊國關

河絕新秋草露深陸機嬰世網應負故山心 皇甫冉

贈莊訥詩曰世故還相見天涯共向東春歸江海上人

老別離中郡吏名何晚沙鷗道自同甘泉須早獻且莫

歎飄蓬 姚係古別離詩曰涼風已嫋嫋露重木蘭枝

獨上高樓望行人遠不知輕寒入洞戶明月滿秋池燕

去鴻方至年年是別離 韓愈祖席詩曰淮南悲木落

而我亦傷秋況與故人別那堪羈宦愁榮華今異路風

雨苦同憂莫以宜春遠江山多勝遊

張籍薊北旅思

詩曰日日望鄉國空歌白苧詞長因送人處憶得別家  
時失意還獨語多愁祇自知客亭門外柳折盡向南枝

白居易原上草詩曰離離原上草一歲一枯榮野火

燒不盡春風吹又生遠芳侵古道晴翠接荒城又送王

孫去萋萋滿別情

賈島旅遊詩曰此心非一事書札

若為傳舊國別多日故人無少年空巢霜葉落疎牖水

螢穿留得林僧宿中宵坐默然

馬戴早發故園詩曰

語別在中夜登車離故鄉曙鐘寒出岳殘月迴凝霜風  
柳條多折沙雲氣轉黃行逢海西鴈零落不成行 又  
送人遊蜀詩曰別離楊柳陌迢遞蜀門行若聽青猿後  
應多白髮生虹霓侵棧道雨雪雜江聲過盡愁人處煙  
花是錦城 薛能送友人出塞詩曰榆關到不可何況  
出榆關春草臨歧斷邊樓帶日閑人歸穹帳外烏發廢  
營間此地秋堪想霜前作意還 溫庭筠送人東遊詩  
曰荒戍落黃葉浩然離故關高風漢陽渡初日郢門山

江上幾人在天涯孤棹還何當重相見樽酒慰離顏

又商山早行詩曰晨起動征鐸客行悲故鄉雞聲茅店  
月人跡板橋霜榭葉滿山路枳花明驛牆因思杜陵夢  
鳧鴈滿迴塘 宋楊萬里別教授吳景衡詩曰道合從

人笑情親覺別難得朋何恨晚到老幾相看世路今逾  
窄吾徒却自寬此心各相勉不但道加餐 又清早出

城別王宣子舍人詩曰月細惟愁落陽昇未要忙出門  
雞未覺夾路稻初香涉世寧容懶侵星幸稍涼病來詩

久廢覓句費商量 陸游送仲高兄扶滿赴行在詩曰  
兄去遊東閣才堪直北扉莫憂持索晚姑寄乞身歸道  
義無今古功名有是非臨分出苦語不敢計從違 王  
十朋送劉方叔兼簡全之詩曰相見無多日依前又索  
居斷魂梅的皜過眼柳蕭疎匹馬來時路征鴻別後書  
君歸見溫叟為我問何如 又送陳商霖詩曰相逢猶  
未款作別太匆匆日落江東暮人歸冀北空音塵應暫  
隔談笑更誰同回首蕭峰外明朝我亦東 戴復古送

行詩曰荏苒歲云暮雪霜天正寒取程毋太急御下放  
教寬朝夕去家遠關山行路難邊頭辦功業恐不在儒  
冠 又代人送別詩曰南浦春波碧東風送客船別君  
楊柳外揮淚杏花前粉壁題詩句金釵當酒錢一聲離  
岸槽心碎楚江邊 翁卷送人遊天台詩曰暫遊行李  
少幾日到天台船帶落潮發月從前浦來花源香不斷  
藥地綠成堆莫學他劉阮經年忘却回 又留別吳中  
士友詩曰羈遊雖不閑幽思亦相關今日經行處他宵



夢寐間松江雲在水茂苑樹成山況復多吟客令人懶  
欲還 趙師秀楊柳塘寄徐照詩曰因貧為遠別已是  
十三程盡日行山色逢人問地名近書無便寄新句與  
誰評想爾寒宵雨思子亦夢成 徐照送翁靈舒遊邊  
詩曰孤劔色磨青深謀秘鬼靈離山春值雪憂國夜觀  
星奏凱邊人悅翻營戰地腥期君歸幕下何石可書銘  
又懷趙紫芝詩曰一別一百日無書直至今幾回成  
夜夢獨自發秋吟小雪衣猶綌荒年米似金知音人亦

有誰若爾知心 徐璣中川別弟詩曰中川人語別南

國夜何其江迴風來急山低月落遲纜從前浦遠角在

古城吹五畝耕鋤地何當手共犁 又送徐照先回京

師詩曰骨體先如鶴離家歲已周欲知詩思遠曾共楚

鄉遊窮達身將老分攜菊正秋江西看舊友歸計少遲

留 又別趙黃中詩曰世道難為友相期一見中但令

心事合不在語言同秋早湘煙白舟移蓼岸紅別懷如

迴野長與水雲通 元虞集奉別阿爾輝東泉學士遊

甌越詩曰憶昔同經幄春明下玉池掛冠俄去國連舸  
總盛書荀脯嘗紅稻蕁羹斫白魚莫言江海遠咫尺玉  
堂廬 明劉基題朱孟章虞學士送別圖後詩曰秋郊  
一杯酒握手念將離落日照野水涼風生樹枝今日重  
相憶青山如舊時鬢毛非松柏爭得不成絲 高啟楓  
橋送丁鳳詩曰紅葉寺前橋停君晚去橈醉應忘世難  
歸不計程遙山隱初沈日風催欲上潮離魂來此處還  
似灞陵銷 又送易從事祖飲南渚詩曰疎楊映老荷

別處最秋多送客年年路愁人日日波霞明添醉色風  
急斷離歌莫謂官程促青山易看過 宋濂送許時用

還刻詩曰尊酒都門外孤帆水驛飛青雲諸老盡白髮  
幾人歸風雨魚羹飯煙霞鶴氅衣因君動高興予亦夢  
柴扉 邊貢留別張西盤大參詩曰滿酌豈辭醉未行  
先憶君山城稀見菊關樹不開雲地入河源渺天連塞  
日曛那堪北來鴈偏向別時聞 何景明送呂子詩曰  
京洛三年客雲霄萬里達上書俱不報解珮獨先歸北

極臨燕甸南山繞漢畿相將未可料岐路斷蓬飛 楊

慎折楊柳詩曰白雪新年盡東風昨夜驚芳菲隨處滿

楊柳最多情染作春衣色吹為玉笛聲如何千里別只

贈一枝行 謝榛秋夜烏給事宅言別詩曰故人同此

夜離思且銜杯古樹當庭合流螢到席回燭花留我醉

諫草識君才異日關河隔秋鴻幾北來 李攀龍別李

戶曹詩曰舊游京陌滿何處珥貂行念子從王事令人

識宦情春風吹遠別芳草送孤征莫歎謀身拙前賢重

請纓

增唐李白別中都兄明府詩曰吾兄詩酒繼陶君試宰  
 中都天下聞東樓喜奉連枝會南陌愁為落葉分城隅  
 綠水明秋日海上青山隔暮雲取醉不辭留夜月鴈行  
 中斷惜離羣 李頎送魏萬之京詩曰朝聞遊子唱驪  
 歌昨夜微霜初度河鴻鴈不堪愁裏聽雲山況是客中  
 過關城曙色催寒近御苑砧聲向晚多莫是長安行樂  
 處空令歲月易蹉跎 杜甫送韓十四江東省親詩曰

兵戈不見老萊衣，歎息人間萬事非。  
我已無家尋弟妹，君今何處訪庭闈。  
黃牛峽靜灘聲轉，白馬江寒樹影稀。  
此別應須各努力，故鄉猶恐未同歸。  
又恨別詩曰：洛

城一別四千里，突騎長驅五六年。  
草木變衰行劔外，兵戈阻絕老江邊。  
思家步月清宵立，憶弟看雲白日眠。  
聞道河陽近乘勝，司徒急為破幽燕。  
又和裴迪登蜀州

東亭送客逢早梅，相憶見寄詩曰：東閣官梅動詩興，還如何遜在揚州。  
此時對雪遙相憶，送客逢春可自由。  
幸

不折來傷歲暮若為看去亂鄉愁江邊一樹垂垂發朝

夕催人自白頭 高適送前衛縣李案少府詩曰黃鳥

翩翩楊柳垂春風送客使人悲怨別自驚千里外論交

却憶十年時雲開汶水孤帆遠路繞梁山匹馬遲此地

從來可乘興留君不住益淒其 又送李少府貶峽中

王少府貶長沙詩曰嗟君此別意何如駐馬銜杯問謫

居巫峽啼猿數行淚衡陽歸鴈幾封書青楓江上秋天

遠白帝城邊古木疎聖代即今多雨露暫時分手莫躊



躡 岑參使君席夜送嚴河南赴長水詩曰嬌歌急管

雜青絲銀燭金杯映翠眉使君地主能相送河尹天明  
坐莫辭春城月出人皆醉野戍花深馬去遲寄聲報爾  
山翁道今日河南勝昔時 又暮春虢州東亭送李司

馬歸扶風別廬詩曰柳驪鶯嬌花復殷紅亭綠酒送君  
還到來函谷愁中月歸去磻溪夢裏山簾前春色應須  
惜世上浮名好是閑西望鄉關腸欲斷對君衫袖淚痕  
斑 錢起送興平王少府遊梁詩曰舊識相逢情更親

板懼甚少愴離頻黃綬罷來多遠客青山何處不愁人

日斜宮樹間蟬滿雨過關城見月新梁苑遺風重詞賦  
諸侯應念馬卿貧 劉長卿贈別嚴士元詩曰春風倚

棹闔閭城水國春寒陰復晴細雨濕衣看不見閑花落  
地聽無聲日斜江上孤帆影草綠湖南萬里情東道若  
逢相識問青袍今已誤儒生 皇甫冉送李錄事赴饒  
州詩曰北人南去雪紛紛鴈叫汀洲不可聞積水長天  
隨遠客荒城極浦足寒雲山從建業千峰出江至潯陽

九派分借問督郵纔弱冠府中年少不如君 韓翃送  
冷朝陽還上元詩曰青絲纜引木蘭船名遂身歸拜慶  
年落日澄江烏榜外秋風疎柳白門前橋通小寺家林  
近山帶平湖野寺連別後依依寒食裏共君攜酒在東  
田 李益送賈校書東歸寄振上人詩曰北風吹鴈數  
聲悲況指前林是別時秋草不堪頻送遠白雲何處更  
相期山隨匹馬行看暮路入寒城獨去遲為向東州故  
人道江淹已擬惠休詩 許渾瓜洲留別李翊詩曰泣

玉三年一見君白衣顛顛更離羣楊堤惜別春潮晚花  
榭留歡夜漏分孤館宿時風帶雨遠帆歸去水連雲悲  
歌曲盡莫重奏心遠關河不忍聞 宋梅堯臣送石昌

言學士詩曰混混拍堤瓜蔓水軒軒銜尾挂檣船使君  
東下只朝夕父老走迎無後先古堞秋耕拾銅鏃長淮  
瀑雨入壕連鳴猿舞鶴仍持去不憶承明夜直眠 歐

陽修送張生詩曰一別相逢十七春顏顏衰髮互相詢  
江湖我再為遷客道路君猶困旅人老驥骨竒心尚壯

青松歲久色逾新  
山城寂寞難為禮  
濁酒無時舉爵頻  
又退居述懷寄韓侍中詩曰  
悠悠身世比浮雲  
白首歸來潁水濱  
曾看元臣調鼎鼎  
却尋田叟問耕耘  
一生勤苦書千卷  
萬事銷磨酒百分  
放浪豈無方外士  
尚思親友念離羣  
蘇軾和董傳留別詩曰  
麤繒大布裹生涯  
腹有詩書氣自華  
厭伴老儒烹瓠葉  
強隨舉子踏槐花  
囊空不辦尋春馬  
眼亂行看擇壻車  
得意猶堪誇世俗  
詔黃新濕字如鴉  
又正月二十日往岐亭郡人潘

古郭三人送余于女王城東禪莊院詩曰十日春寒不出門不知江柳已搖村稍聞泱泱流水谷盡放青青沒燒痕數畝荒園留我住半餅濁酒待君溫去年今日關山路細雨梅花正斷魂 黃庭堅贈別幾復詩曰風驚

鹿散豫章城邂逅相逢食楚革佳友在門忘燕寢故人  
癸藥見平生只今滿座且樽酒後夜此堂還月明契闊  
愁思已知處西山影落暮江清 又夏日夢伯兄寄江  
南詩曰故園相見畧雍容睡起南窗日射紅詩酒一年

談笑隔江山千里夢魂通河天月暈魚分子榭葉風微  
鹿養茸幾度白沙青影裏審聽嘶馬自搢筇 葛長庚  
別李仁甫詩曰君向星江結草廬我來抵掌笑相呼三  
盃碧液漲瓷盞一縷青煙纏竹爐劒舞春風花爛漫琴  
彈夜雨竹蕭疎明朝拄杖知何處猿叫千山月滿湖

陸游杜叔高秀才雨雪中相過留一宿而別口誦此詩  
以送之詩曰久客方知行路難關山無際水漫漫風吹  
欲倒孤城遠雪落如筵野寺寒暮挈衣囊投土室晨沽

村酒掛驢鞍文章一字無人識胸次徒勞萬卷蟠 又

送客城西詩曰倦客憑鞍半醉醒秋光滿眼歎頽齡日  
斜野渡放船小風急漁村攤網腥客思不堪聞斷鴈詩  
情強半在郵亭歸來更恨城笳咽煙火昏昏獨掩屏

王十朋別同學詩曰蕭瑟秋聲起桂枝登臨誰賦送將  
歸伴人燈火情猶在過眼煙雲事已非記取齏鹽同冷  
落忍教襟袂遽分違明朝一笑江山隔望斷日邊鴻鴈  
飛 戴復古送滕審言歸長沙詩曰折柳亭前送故人



平沙留得馬蹄痕雲生渡北迷行路煙起江南認別村  
恨不與君同上道歸來無伴自開樽西樓獨倚黃昏月  
欲倩飛鴻寄斷魂 又鎮江別總領吳道夫侍郎時愚  
子琦來迎侍催歸詩曰落魄江湖四十年白頭方辦買  
山錢老妻懸望占烏鵲愚子催歸若杜鵑濟世功名付  
豪傑野人事業在林泉難禁別後相思意或有封書寄  
鴈邊 翁卷留別南昌諸友詩曰衰顏怕被青銅見病  
骨堪同瘦鶴羣出久併荒幽徑菊未歸長憶滿山雲春

風豈識吟人恨夜雨頻於客舍聞萬柳百花好時節別  
君愁緒亂紛紛 趙師秀送翁卷入山詩曰已送山民

歸舊廬子今復去我何如漸成老大難為別早占清閑  
未是疎小雨半畦春種藥寒燈一盞夜脩書有人來問  
陶貞白說與華陽何處居 又會宿送子野詩曰又承  
出郭到貧家一度分攜鬢易華自說印書春可寄獨慚  
闕酒夜難賒眠遲古鼎銷殘火吟苦寒缸落細花羸病  
不能親送別夢魂先立渡頭沙 真山民連城春夜留

別張建溪詩曰飛絮遊絲客子心連城那忍遽分襟青  
燈應見詩情苦濁酒不如交味深一榻暖風棲竹屋半  
闌淡月立花陰離懷今夜先收拾盡付明朝馬上吟

元楊載送薛元卿歸龍虎山詩曰金門詔下羽人歸欲  
向山中採蕨薇琥珀懸崖松樹老琅玕倚澗竹根稀高  
巖蓄雨星辰濕古石緣雲逕路微養性可無軒冕累游  
塵元不浣仙衣 明楊維禎送沈生還江州詩曰鄉心  
正爾怯高樓況復樓中賦遠遊客裏登臨俱是感人間

送別不宜秋風前落葉隨車滿日下浮雲共水流知汝

琵琶亭畔去白頭司馬憶江州 高啟寒山寺送別詩

曰楓橋西望碧山微寺對寒江獨掩扉船裏鐘催行客  
起塔中燈照遠僧歸漁村寂寂孤煙近官路蕭蕭衆葉  
稀須記姑蘇城外泊烏啼時節送君違 宋濂留別陳

秀才詩曰百里春帆到海隅不堪回首拂征裾少年未  
慣長為客有便相煩數寄書言子絃歌遺化在吳王城  
塹劫灰餘英游從此成踈闊後夜懷君月上初 李東

陽和若虛郎中贈行詩曰赤日黃塵馬倦行石橋山店  
有官程城頭路盡千峰隔袖裏詩來兩腋清蟬雜柳風  
秋漸遠鶴翻松露夜還驚欲知小吏將詩意記取柴門  
剝啄聲 又送劉東山司馬致仕詩曰十年兩度送君  
歸聽說鄉山興欲飛歲久兒孫頭角變日長賓客往來  
稀平橋著板通樵徑老樹盤根作釣磯強欲相從無舊  
業定於何處解朝衣 王守仁別希顏詩曰後會難期  
別未經莫辭行李滯江城且留南國春山興共聽西堂

夜雨聲歸路終知雲外去晴湖想見鏡中行為尋洞裏

幽栖處還有峯頭雙鶴鳴 邊貢次獻吉留別詩曰初

春郊甸積雪滿客子出門岐路長征車杳杳去不息關

柳青青愁未央却望泰山懷古道即歸梁苑亦他鄉十

年京洛交遊地日夕風煙思渺茫 謝榛送客游洞庭

湖詩曰相逢楚客問巴州此去揚帆湖上游天漢長連

洞庭水雲霞半入岳陽樓低空白鴈投寒渚隔浦丹楓

照暮秋莫向湘君聽鼓瑟黃陵月冷不勝愁 王世貞

徐大宗伯同唐婁張三子見餞至新洋江始別詩曰新  
洋江口好停舟淡月籠煙破暝愁君卧可能忘魏闕予  
行終擬問菟裘朝歌易作雙青眼別酒難禁兩白頭總  
是秣陵多勝地却慚人喚鳳皇遊屠隆北上彭城別

姜仲文詩曰荒城濁酒送斜陽數起門前指鴈行木葉  
時時作風雨星河夜夜在衣裳坐深熠燿初驚扇秋冷  
莎雞半入林何物最能關別恨野橋殘月照清霜

增唐杜牧送盧秀才詩曰春瀨與煙遠送君孤棹開潺

溪如不改愁更釣魚來 又送薛種遊湖南詩曰買得

松醪酒秋來美更香憐君片雲意一棹去瀟湘 又寄

遠人詩曰終日求人卜回回道好音那時離別久入夢

到如今 又別沈處士詩曰舊事參差夢新程遷迤秋

故人如見憶時到寺東樓 李商隱散關遇雪詩曰劒

外從軍遠無家與寄衣散關三尺雪回夢舊鴛鴦機 又

詩曰滯雨長安夜殘燈獨客愁故鄉雲水地歸夢不宜

秋 明高啟折楊柳歌詞曰高枝拂翠幃低枝垂綺筵



春風千萬樹此樹妾門前 又詩曰江頭橫吹悲北客  
休南去聞道武昌門愁人無別樹

增唐許敬宗奉和聖製餞來濟應詔詩曰萬乘騰鑣警  
岐路百壺供帳餞離宮御溝分水聲難絕廣宴留歌曲  
易終 王勃秋江送別詩曰早是他鄉值早秋江亭明  
月帶江流已覺逝川傷別念復看津樹隱離舟 李白

橫江詞曰橫江館前津吏迎向余東指海雲生郎今欲  
渡緣何事如此風波不可行 又黃鶴樓送孟浩然之

廣陵詩曰故人西辭黃鶴樓煙花三月下揚州孤帆遠

影碧空盡唯見長江天際流 王昌齡芙蓉樓送辛漸

詩曰寒雨連江夜入吳平明送客楚山孤洛陽親友如

相問一片冰心在玉壺 又送別魏二詩曰醉別江樓

橘柚香江風引雨入船涼憶君遙在湘山月愁聽清猿

夢裏長 又重別李評事詩曰莫道秋江離別難舟行

明日是長安吳姬緩舞留君醉隨意青楓白露寒 又

盧溪別入詩曰武陵溪口駐扁舟溪水隨君向北流行

到荆門上三峽莫將孤月對猿愁  
王維送元二使安

西詩曰渭城朝雨裊輕塵客舍青青柳色新勸君更盡  
一盃酒西出陽關無故人  
又送別詩曰送君南浦淚

如絲君向東州使我悲為報故人憔悴盡如今不似洛  
陽時  
又送沈子福之江東詩曰楊柳渡頭行客稀  
師蕩槳向臨圻唯有相思似春色江南江北送君歸

賈至送李侍御赴常州詩曰雪晴雲散北風寒楚水吳  
山道路難今日送君須盡醉明朝相憶路漫漫  
岑參

虢州後亭送李判官使赴晉絳詩曰西原驛路掛城頭  
客散江亭雨未休君去試看汾水上白雲猶是漢時秋

杜甫贈鄭鍊赴襄陽詩曰鄭子將行罷使臣囊無一  
物獻尊親江山路遠羈離日裘馬誰為感激人 高適

別董大詩曰千里黃雲白日曛北風吹鴈雪紛紛莫愁  
前路無知己天下誰人不識君 孟浩然送杜十四之

江南詩曰荆吳相接水為鄉君去春江正淼茫日暮孤  
舟何處泊天涯一望斷人腸 劉長卿送裴郎中貶吉

州詩曰猿啼客散暮江頭人自傷心水自流同作逐臣  
君更遠青山萬里一孤舟 皇甫冉送魏十六還蘇州  
詩曰秋夜沉沉此送君陰蟲切切不堪聞歸舟明日毗

陵道回首姑蘇是白雲 朱放送溫台詩曰渺渺天涯

君去時浮雲流水自相隨人生一世長如客何必今朝  
是別離 郎士元送麴司直詩曰曙色蒼蒼兼曙雲朔  
風燕鴈不堪聞貧交此別無他贈唯有青山遠送君

戎昱移家別湖上亭詩曰好是春風湖上亭柳條藤蔓

繫離情黃鸝久住渾相識欲別頻啼四五聲 宋蘇軾

贈別詩曰青鳥銜巾久欲飛黃鶯別主更悲啼慙慙莫

忘分攜處湖水東邊鳳嶺西 黃庭堅奉答李和甫代

簡絕句曰山色江聲相與清卷簾待得月華生可憐一

曲竝船笛說盡故人離別情 楊萬里夜離零陵以避

同寮追送之勞留簡諸友詩曰思歸日日只空言一棹

今真水月間半夜猶聞郡樓鼓明朝應失永州山 又

送客山行詩曰嶺雲烏作小涼天山店重來憶去年獨

樹丹楓誰不見何須更立萬松前  
朱熹送德和弟歸

婺源詩曰十舍辛勤觸熱來  
琴書曾未拂塵埃  
秋風何事催歸興步出閩山黃葉堆  
明高啟山中別寧公歸

西塢詩曰一上香臺看落暉  
沙村孤樹晚依依  
老僧不出青山寺只有鐘聲送客歸  
又送賈麟歸江上詩曰

別淚紛紛逐斷猿  
貧交無贈只多言  
離愁正似蘼蕪草  
一路隨君到故園  
又江上送客詩曰春風江上蕩舟

過垂柳垂楊拂浪波  
惆悵今年頻送客  
長條欲折已無

多 解縉赴廣西別甥彭雲路詩曰多情為我謝彭郎

采石江深似涓陽相聚六年如夢過不如昨夜一更長

唐寅送陳憲章詩曰僧房酌酒送君行把臂西風無限情此際若為銷別恨兩行紅粉轉春鶯 李夢陽夏

口夜泊別友人詩曰黃鶴樓前日欲低漢陽城樹亂烏啼孤舟夜泊東遊客恨殺長江不向西 楊慎征人早

行圖詩曰杜鵑花下杜鵑啼烏白樹頭烏白棲不待鳴

雞度關去夢中征馬尚聞嘶 謝榛留別張德隆詩曰



來時積雨沒平原去路鳴蟲秋正繁  
桂樹花開如有興  
紫騮嘶過孝王園 又送周秀才歸錢塘詩曰  
燕京陌上送周郎歸到西湖春草長  
清夜開樽多舊侶滿船歌管月如霜

御定淵鑑類函卷三百一

謹案卷三百一第三頁前三行千年踵武刊本踵

訛鍾據詩紀改


第十七頁後四行曉燈暗離室刊本離訛雕據詩

紀改

第四十三頁後七行巫峽啼猿數行淚刊本啼猿

訛猿啼據全唐詩改





總校官庶吉士臣張能照

校對官編修臣朱攸

謄錄監生臣沈元錡

欽定四庫全書薈要

子部

御定淵鑑類函卷三百二

詳校官兵部主事臣雷純

臣紀昀詳校

欽定四庫全書蒼要卷一萬一千七百五十

子部

御定淵鑑類函卷三百二

人部六十一 別

贈答

別五 下

原賦 魏文帝離居賦曰惟離居之可悲政獨處于空牀

愁耿耿而不寐歷冬夜之悠長驚風厲于閨闈忽增激  
于中房動帷裳之晦曖彼明燭之無光 又感離賦曰  
建安十六年上西征余居守老母諸弟皆從不勝思慕

乃作賦曰秋風動兮天氣涼居常不快兮中心傷出北

園兮彷徨望衆墓兮成行柯條惜兮無色綠草變兮萎

黃脫微霜兮零落隨風雨兮飛揚日薄暮兮無悰思不

衰兮愈多招延佇兮良久忽踟躕兮忘家 又永思賦

曰仰北辰而永思泝悲風以增傷哀遐路之漫漫痛長

河之無梁願託乘於浮雲嗟逝速之難當 曹植愍志

賦曰或人有好隣人之女者時無良媒禮不成焉彼女

遂行適人有言之於余者余心感焉乃作賦曰竊託音



於往昔迄來春之不從思同遊而無路情壅隔而靡通  
哀莫哀於永絕悲莫悲於生離豈良時之難俟痛余質  
之日虧登高樓以臨下望所歡之攸居去君子之清宇  
歸小人之蓬廬欲輕飛而從之迫禮防之我拘 又歸  
思賦曰背故鄉而遷徂將遙憩乎北濱經平常之舊居  
感荒壤而莫振城邑寂以空虛草木穢而荆榛嗟喬木  
之無陰處原野其何為信樂土之足慕忽竝日而載馳  
晉陸機別賦曰伊公子之可懷悲永別之屆期悼同

居之無樂曾不踰乎一期經春秋之寒暑常戚戚而不  
怡登九層而脩觀超臨遠以相思 傳咸感別賦曰嘉

天地之交泰美萬物之會通悅朋友之攸攝慕管鮑之  
遐蹤退以文而會友欽公子之清塵信同聲之相應意  
未寫而情親誓稚好之齟齬分綢繆而日新蘭蕙含芬  
有時而馨龍躡足有時而征乾道變化時惟大明我  
我睦友載揚厥聲降聖宰之旌招曜羽儀之上京贊唐  
虞之嘉運超飛躍乎太清佩銀璜於帝側拖紫艾於天

庭瞻宸極之眇眇喜吾子之寵榮無荆王之夜觀猥齊  
景於夜光敢有覬於斯舉欣與子而竝翔天啟其願自  
忝蘋蘩幼則同遊長則同班同心厥職其臭如蘭庶績  
未凝聖朝疇咨顯佐納言光綜萬機出順景而為偶入  
闡然而無依步虛宇以低回想宴笑之餘暉意纏綿而  
彌結淚雨面而霑衣 梁江淹別賦曰黯然銷魂者惟  
別而已矣况秦吳兮絕國復燕宋兮千里或春苔兮始  
生乍秋風兮暫起是以行子腸斷百感悽惻風蕭蕭而

異響雲漫漫而竒色舟凝滯於水濱車逶迤於山側櫂  
容與而詎前馬寒鳴而不息掩金觴而誰御橫玉柱而  
霑軾居人愁卧况若有亡日下壁而沉彩月上軒而飛  
光見紅蘭之受露望青楸之離霜巡層楹而空掩撫錦  
幙而虛涼知離夢之躑躅意別魂之飛揚故別雖一緒  
事有萬族至若龍馬銀鞍朱軒繡軸帳飲東都送客金  
谷琴羽張兮簫鼓陳燕趙歌兮傷美人珠與玉兮豔暮  
秋羅與綺兮嬌上春驚駟馬之仰秣聳淵魚之赤鱗造

分手而銜涕咸寂寞而傷神乃有劒客慙恩少年報士  
韓國趙廁吳宮燕市割慈忍愛離邦去里瀝泣共訣技  
血相視驅征馬而不顧見行塵之時起方銜感於一劒  
非買價於泉裏金石震而色變骨肉悲而心死或乃邊  
郡未和負羽從軍遼水無極雁山參雲閨中風暖陌上  
草薰日出天而曜景露下地而騰文鏡朱塵之照爛襲  
青氣之烟煨攀桃李兮不忍別送愛子兮霑羅裙至如  
一赴絕國詎相見期視喬木兮故里訣北梁兮永辭左

右兮魂動親賓兮淚滋可班荆兮增恨惟樽酒兮叙悲  
值秋鴈兮飛日當白露兮下時怨復怨兮遠山曲去復  
去兮長河涓又若君居淄右妾家河陽同瓊珮之晨照  
共金爐之夕香君結綬兮千里惜瑤草之徒芳慙幽閨  
之琴瑟晦高臺之流黃春宮闕此青苔色秋帳含茲明  
月光夏簟青兮晝不暮冬缸凝兮夜何長織錦曲兮泣  
已盡迴文詩兮影獨傷儻有華陰上士服食還仙術既  
妙而猶學道已寂而未傳守丹竈而不顧鍊金鼎而方

堅駕鶴上漢驂鸞騰天暫游萬里少別千年惟世間兮  
重別謝主人兮依然下有芍藥之詩佳人之歌桑中衛  
女上宮陳娥春草碧色春水淶波送君南浦傷如之何  
至乃秋露如珠秋月如珪明月白露光陰往來與子之  
別思心徘徊是以別方不定別理千名有別必怨有怨  
必盈使人意奪神駭心折骨驚雖淵雲之墨妙嚴樂之  
筆精金閨之諸彥蘭臺之群英賦有凌雲之稱辯有雕  
龍之聲誰能摹暫離之狀寫永訣之情者乎 又去故

鄉賦曰日已暮兮隱吳山之丘墟北風折兮絳花落流水散兮翠莖疎發桂枝而不見悵浮雲之離居乃凌大壑越蒼淵茫茫積水陵陵斷山窮陰匝海平蕪帶天於是泣故關之已盡傷故國之無際出汀洲而解冠入淑浦而捐袂芳洲之草行欲暮桂水之波不可渡絕世獨立兮報君子之一顧是時霜翦蕙兮風摧芷平原晚兮黃雲起重曰江南之杜蘅兮色已陳願使黃鵠兮報佳人橫羽觴而掩望撫玉琴兮何親 劉孝儀歎別賦曰



在羈旅兮為思每居常而不樂意難偕於駘蕩情易激  
於隕獲愁非和而自來憂試排而不却退求已以自省  
慨撫衿而太息位不俟於一進髮徒彰於二色名有似  
於務耕學無均於譬織在初歸之為慶庶因拙而自收  
保私庭之宴喜共昆弟而嬉遊校小文於搦筆比楷式  
於臨流止每歡於接膝行如喜於同輶忽一去而數千  
遂離居而別域阻同被於當寐乖共餐於終食唯憑遠  
望以代歸負相思其無力

張纘離別賦曰太常劉侯

前輩宿達余在紈綺之歲固已欽其風矣及理棹江干攬涕還望米蕭之詠不覺成篇彼劉侯之矯矯承世德之清輝挺荆衡之箇籛輝江漢之珠璣昔相知於一定逾盛衰乎二紀豈因媒以成親非彈冠而來仕分自諧於金石情冥符乎蘭芷忘時輩之後先略相知之年齒及胥遇於雲閣又方駕而聯曹宵擁衾而暗語晝脫鞅以遊遨案方前而等食衣共體而同袍猶合歡之蠲忿如來蘇之釋勞唯吾人之與子兮諒不言其已名在百

代而奚殊雖千年而同調寧風波之所移豈流俗之能  
要非高唱而云擬逢下士而或笑隔願言於信次尚眷  
眷而興懷矧雲崖之遠訣抱離袖而長乖顧龍門而掩  
涕瞻郢路而何偕在驚禽之屢感迫徂年之長暮眺湘  
沅之分流遵洞庭之永路山峻高而易隱浦漣迴而難  
泝援啾啾而夜吟鴉騷騷而曉度撫客子兮其何心能  
辭鄉兮別故抱荃蕙之遺芳共離披於霜露 增唐韓  
愈別知賦曰余取友於天下將歲行之兩周下何深之

不即上何高之不求紛擾擾其既多咸喜能而好脩寧  
安顯而獨裕顧阨窮而共愁惟知心之難得斯百一而  
為收歲癸未而遷逐侶蟲蛇於海陬遇夫人之來使闢  
公館而羅羞索微言於亂志發孤笑於羣憂物何深而  
不鏡理何隱而不抽始參差以異序卒爛漫而同流何  
此歡之不可恃遂駕馬而迴輶山礧礧其相軋樹蓊蓊  
其相摶雨浪浪其不止雲浩浩其常浮知來者之不可  
以數哀去此而無由倚郭郭而掩涕空盡日以遲留

宋黃庭堅別友賦曰曩聞義於孫李指尊選以見招惜  
予行之舒舒曰其夜以為朝予望道於坳垣見萬物之  
富有恨逸駕之絕塵又驂予以四牡喟車後之無策其  
四方乎索友仰雲飛而注弋俯淵靚之沉鈞或一能之  
勝予忘日月之不予謀或登吞舟之鱗或下垂天之翼  
手予弓而不釋恐斯道之或息維廬江之四季三隱約  
於龍眠維若人之仕蚤懷明月而麗川歲庚午而會梁  
語聞道之大用吸江漢以為深累丘嶽以自重尾擊之

而首應西犯之而東抗棄鼓旗而不逐儼其陣之堂堂  
偉道學之崇崛憎懦夫之激昂觀出日於東方雖食焉  
而不吝無肯綮以自試居自喜於游刃彼覆却之萬方  
期斯言之猶信水渾渾而進舟風剌剌而侵裘恐事親  
之不歡則惟是之同憂 元虞集別知賦曰余忽忽處  
此之無故兮幾偃蹇以自窮逝斂裳以遐征兮抗九霄  
之雲風頻三辰之徘徊兮遲後古以為期何夫子之張  
張兮亦踉蹌而在茲吁嗟乎世德之浩浩兮恥謂人以

不賢陳珮玉於交逵兮被徒輿以瑤環設厚顏之鬱沉  
兮孰敢即問乎津涯發疾叫於咽嗌兮衆披靡而莫支  
夫冶倡之狐惑兮豈不足於內揆顧西子之蓬垢兮益  
返忌乎令姿惟前聖之無悶兮老氏亦貴夫知希顧涼  
薄之多懲兮猶慷慨而尚辭余固將去此而無悔兮念  
夫子之與我日進余以不及兮又證余以其可余嘗究  
往來之為道兮論因革之為權莫或知其濩落兮子獨  
謂其固然庶久子以自輔兮克有聞以時行忽先我而

南騫兮殆若為乎余情迺歌以送之曰長江渾渾兮春  
多浪波白日耿耿兮擊楫為歌天薄我賦兮非以病我  
吁嗟乎昔之盛者何其多 明何景明別思賦曰君何  
為兮遵脩途以長徂俾予懷之弗怡曠悅倘而罔憩顧  
左右而若遺莽川陸之迴薄迴城闕之逶迤山翳翳而  
景入林蒼蒼而鳥稀拂清霜而採松迎夕露而折葵托  
涓忱於微贈諒予志之可追皎秋日以矢心指歲寒以  
為期俟行塵之我延臨晨風而褰衣 又後別思賦曰



懷諸彥之雅趣款行客以終宵慨離違之多端接晤語  
而逍遙時乃御閒館即別院天列列而疾颺月霏霏而  
微霰開重簾之華燈飛逸翰於清讌締久要而莫渝顧  
暫睽而益眷瞻芳塵之未遐仰光惠而引領况予神而  
奮馳悵予駕之弗騁覽歲事之遲暮延軒楹之夕景葉  
歷歷以辭秋霜淒淒而凝冷顧征鴻之稍滅戀行雲之  
佇影送夫君以申佩寄一感於茲遊悼霖澤之久愆恐  
江河之不流矧庶役之未蠲固凋弊之所由懲舊途之

仆軌濟巨川而思舟操吾道而罔屈何令名之不脩傾  
風譽於咫尺日結睇於河洲 袞袞別知賦曰昔余未  
燥髮兮馳篤慕於英指曠矯迹之難儔兮諒褊心之寡  
協維王生之好脩兮荃中情之固結繼神緒以昭休兮  
承丕祗之宏業騫逸軌以高驥兮抗先民之皇烈既沉  
志於經墳兮復窮精於簡牒辯機緯之義象兮採術藝  
之琛竒吐黃中之緒論兮布卓詭之妍詞式大猷以申  
典兮何古人之足師包豈弟之上仁兮含條理之令姿

敦人綱以周慎兮秉玉度其溫如誦棣華之嘉什兮玩  
蘭臭之易辭翔藻譽於東序兮騰茂聞於遐甸握靈珠  
而弗售兮慨和璞之徒獻豈命運則然兮倂時俗之蔽  
眩幸膂力之方剛兮從有司之嘉薦叩天閣以彙征兮  
闕亨衢而豹變期良田於晚歲兮庶脩名之早建 趙  
時春別知賦曰平涼趙時春既放逐於涇水之陽笄頭  
之麓友魚鳥而伍麋鹿南山戚子秀夫釋輜轄而訪焉  
曰吾聞聖人不役役於時而蟬蛻於物上故實之而冰

消燥之而春盎河淮橫流巨靈天吳顛覆吞雲而砥柱  
呂梁之碣不移也吾子奈何解朱紘以紐犁埋韶濩之  
清賞伏龍光於重淵溷淤泥而長往負鹽車而垂耳忘  
萬里之雄想曷以翹首奮翼嘯青雲以欲上騰驤於九  
遠之衢俟軒蓋之高敞苟黃虞之有作猶庶幾於方響  
使泮廊而靡倡竟闕寂而孰與為黨乎時春曰唯唯夫  
子所言乃見田躍淵之志蓋未覩於盤螭潛虬之事也  
蚤負禪而振股視九華瑤池之境猶鉅厠也異哉軒轅

氏之問彼鬣鬣馬知其具茨乎田有粃粃無羨福荔釋  
蹻息蔭以誇連騎操椎攻堅不藉鋒穎之利故聖人喟  
然於浴沂而擊節於顏氏興漆雕之深說數有望於由  
賜故曰達人安命君子不二仁者見之謂之仁智者見  
之謂之智百姓日用而不知庶幾乎羲皇之治戚子嗎  
然而笑稱詩曰振清風兮被皓月南山翠律兮涇流馬  
歇執策援綏載脂而別徐階別知賦曰浦南公之將  
行也某既為文以贈然大要能道公之賢而於公相知

之深與某所以別公之情報公之意均有未盡者因為賦以申之取韓子所謂別知者名其篇云繫默默其如語兮黯臨風而獨悲淚淫淫以潛下兮形神悄其支離將攬轡以言邁兮昏莫識其所之試內返以自求兮紆吾心之所思惟今茲之苑結兮曰我悲之有以紛萬類之前陳兮咸仰托於知己驥或升於天閑兮或服鹽而垂耳蘭或雜於艾蕭兮或垂佩之靡靡物無繫於美惡兮論亦無恒於否臧知不知其異評兮夫固視其遇將

淺九淵以為抑兮卑重霄以為揚幸不幸其實存兮雖  
賢聖亦云其徬徨嗟我生之昏昧兮濫科名之忝竊既  
力小而任重兮遂不知而顛跌念受知之無地兮面駢  
羞而中熱日閉戶以省尤兮鬱予心之悒悒何美人之  
卓立兮獨有諒於予哀世方棄而弗顧兮炳流盼於雙  
瞳昇顏色於枯槁兮回沍寒之春融朝既煦予以青陽  
兮夕又披予以惠風仰崇深之被澤兮紆百憂之糾縛  
慰野心於檻猿兮發清音於籠鶴悵人事之多乖兮將

天重予之虐倏相違於中道兮渺孤蹤其焉託飛黃騁  
以遐逝兮材固絕乎蟾蜍鴻鵠翩其高舉兮勢亦豈能  
顧夫燕雀之屯如振予袂而不可從兮倚秋宇而躊躇  
日既為之無光兮髮復為之蕭疎望帝閣其何所兮心  
勞勞以增病夫豈敢怨且尤兮傷予之獨負乎明聖  
所知之欲報兮蹇予力之不競進不可以偉干兮退自  
安夫時命惟達人之大觀兮賤珠玉而輕組纓志相許  
而相期兮曰姱節與令名矢吾脩之伊今兮益自勵於



永貞璧既涅而不可緇兮金亦鍊而彌精弄白雲以徜徉兮抱明月而偃仰駕仁體以為輿兮秉誠明以為鞅樂真境之融泄兮窮聖途之脩廣庶上酬於所知兮浣予懷之愀惘

王學士分攜賦贈吳興張副教曰何光陰之荏苒兮春條去而不可遲懷江南之杳渺兮正綠重而紅稀流雲逝而天潤晴日皎而風微念江山兮阻脩我欲去兮無由奈佳人兮分袂草青青兮縈我愁柳娟娟兮不忍折嘅黃花兮愁欲絕託長條兮贈君綰同

心兮識別惟東南之大郡有錦繡之茗溪雖山水之清  
遠產人物兮尤竒沈慶之風流孟郊之孤危志和之清  
淑子野之芳辭謝安陸抗之所經歷杜牧蘇仙之所遊  
嬉清風千古兮尚在使人俛仰而思之若乃太湖月落  
菴畫雲開金蓋玉膾紫笋青梅或登高而吟嘯或弔古  
而徘徊奉甘旨以娛親會鄉曲以舒懷佳人去兮我心  
悲髮蕭蕭兮明如絲亂春愁兮似織有心事兮誰知寫  
離情於尺素悵不得兮同歸 皇甫湜離思賦曰吾友

朱子將有遠行因為作離思賦廓靖貞以徽居兮泊吾  
御夫四時亮無名世之宏偉兮驤軼羣而登巍惟斯時  
之迅邁兮痲吾衷其不可回憂絲絲其若萌兮又感乎  
友之將行怒離羣而索居兮疇亶予之幽情洵往古之  
不遐兮惜獨慙夫吾生仰前良之遺軌兮聊抑志而自  
寧駢歷坳以遲遲兮相俶途之多坎日掩暝其將落兮  
雲繽紛而承憶迴颺襲於衡側兮魂營營而靡晏予侘  
祭而顧懷兮對予心之不然駿弗必御良弗必庸兮始

以為過言目騃褻之殫棄兮委和氏於泥間何古人之  
不誣兮惟覩象而后宣糝蕙芷以克鱗兮又申之以幽  
蘭紛鬱毓其芬蓋兮珩寶璐而珊珊羌弗察其姤媿兮  
膏予馬以盤桓旦予發於蒲坂兮夕指憩於岐趾過虞  
虢而遊目兮歎息而不遑已謔帝賚之足徵兮感輔台  
之在鄙式茲巖以徘徊兮神發夢而滋惑嗟遇合之何  
常兮慨重華之不覿汨吾歲之日道兮泣連落而累辟  
繫騏驥而弗乘兮即遐落而躊躕服跛牂而振縹兮雖

造父其馬如泝餘皇以登轡兮弊日月而靡由涉長河  
之浩渺兮越棄置而弗售悲吾生之不辰兮悼睽阻之  
疚心思返旆於窮谷兮念鳴鶴之在陰憑浮雲以迴眺  
兮涕橫墜而弗禁亮洪流非一葦之可障兮炯貽則於  
周任時疊疊而不居兮言遄徂於故岑既緯繡而猶合  
兮亦非君子之所欽 皇甫沔感別賦曰別方異緒離  
狀殊端在有情而必款豈同氣而能堪軺車陳於坳側  
舟楫戒於江干或感慨於川逝或行嗟乎路難涕臨觴

而共投心執袂而俱酸善哉江生之言曰黯然銷魂值  
我愛弟端往帝閣愧雙鵠之竝舉兮矯乘雁而孤騫

李杜恨別賦曰紆長恨之端者豈非別離之情耶况秦  
楚兮異域復燕齊兮天涯乍秋信兮飛鴻忽春風兮落  
花是以征人思往遊子戀鄉揮袂欲去心中徬徨日亭  
亭而向低雲黯黯而飛揚念相見之未期聊踟躕而盡  
觴嘶班馬兮蕭蕭駕輕車兮踉踉扁舟去兮水聲駛孤  
帆起兮江風長送行子之將遠獨躑躅而內傷由是心

飛雁天惆悵欲結落睇春花寄影明月試登高而望遠  
渺懷燕而念越通宵夢於飛雲想離情於昔別情淒淒  
兮如秋怨紛紛兮如雪傳掬淚於逝波庶涓涓而不絕  
昔如楚國孤臣少年報士鼓天渡河哀歌吳市慟骨肉  
之淪喪訣申胥而隕涕悲孤劍之誰託囑蘆中而東逝  
懼後騎之可追驚風塵之時起詎桑梓之靡懷憤宗國  
而不視若乃荆卿西去易水張筵賓御涕零寒風蕭然  
崢嶸四顧長虹亘天悲歌擊筑怒髮衝冠嗟壯士之一

去恐長往而不還遂登車而不顧彈長鉞而何言至若  
班超壯心慷慨投筆鳴劔伊吾徼功疎勒玉闕萬里兮  
黃雲多龍沙悵望兮鼓聲咽滯盤橐之遙城慘燕山之  
暮色朔風悲兮鳴笳葱嶺白兮飛雪懷玉門而不見恨  
故鄉之長絕乃若少卿降虜蘇武老歸攜手河梁恨恨  
難辭俛仰傷心無淚可揮歎胡馬之失羣眷思心之依  
依欲相見兮未有期聊尊酒兮寄懷思高臺望兮故鄉  
遠子卿去兮予心悲及夫明妃遠嫁別淚珠飄漢宮紅



落薊門草凋傷蛾眉之憔悴悵紫臺之蕭條琵琶怨而  
風惻朔雲慘而路遙狼山暮兮漢月出驚沙起兮旅魂  
遙若夫鄴中奸雄平原傑士一朝長別歲華不滯歎愛  
姬之無緣想華亭之鶴唳詎魯戈之可揮恍萍梗之如  
寄銅臺高兮白雲飛漳水流兮晚風厲怨總帷之飄飄  
何西陵之可睇或有趙姬越女秦娥衛嬪王孫欲去蕩  
子從軍柔風乍起王睢報春洛陽花滿陽闌草薰白花  
飛雪煙柳停雲傷心此別情詎可論至乃金風避暑秋

月揚輝吳宮燕去衡陽雁飛代馬依風隴水寒漸送君  
之去胡寧不悲是以別方無定別緒何常靡別不恨靡  
恨不長使人目擊神駭情感內傷雖使子雲思竒而吐  
鳳鴻烈文成而挾霜少陵雲垂而海立昌黎鳳躍以龍  
翔惠施雕龍之雄辨太白倚馬之激昂鳴蘭臺之珮玉  
垂金薤之琳琅詎能探中悰之惋恨而寫別離之情狀  
者乎 張東海惜別賦曰於是脂車牽而秣四牡兮指  
雲衢以遐征羌友生之戀戀兮擘子之祛總六轡而縹

馬兮扼子之車奈子之不少留兮倏載馳而載驅心逐  
車輪而輾轉兮胡周道之盤紆目渺渺而瞻望弗及兮  
空佇立以踟躕悠悠白雲之下上兮山宛宛而卷曲耳  
肅肅以鳴秋兮颯涼颼之動木歌伐木之無和兮鳥嚶  
鳴而林霏靄綠期永以為好兮胡中道仳離之速悵獨  
處此兮渺天涯之南北目送蜚鴻兮毋俾爾音之金玉  
王文祿離情賦曰繫離之為情也怒馬刺心兮若調  
飢感感靡騁兮覺地亢而天低隱几嚶嚶兮魂散以飛

注目空冥兮縹緲游思腸糾揉而塊獨處兮懔蘇蘇以  
醉癡將奮迅以解去兮又來集夫盧之眉淚滢滢以交  
下兮每怦怔而怨咨悄兀兀以無聊兮紛索莫之淒其  
儼夢寐其越世兮曷想像其丰儀慨契濶之遐棄兮援  
金石以攄辭展久要而弗諼兮咽閤閤之沉思爰溯合  
歡兮歡豈知匪今斯今兮安知其悲胡能覲止兮豁然  
以心夷春風兮已而花光慘兮行雲遲靈景速速兮奔  
以馳嗟哉合兮終有離

原書漢李陵與蘇武書曰子卿名聲冠於圖籍分義光

於二國形影表於丹青爵祿傳於王室家獲無窮之寵  
永明白於千載夫行志志立求仁得仁雖遭困厄死而  
後已將何恨哉陵前提步卒五千深入匈奴右地三千  
餘里雖身降名辱下計其功豈不足以免老母之命耶  
嗟乎子卿世事謬矣功者福主今為禍先忠者義本今  
為重患是以彭蠡赴流屈原沉身子欲居九夷此不由  
感怨之志耶行矣子卿恩若一體分為二朝悠悠永絕

何可為思人殊俗異死生斷絕何由復達 蘇武報李

陵書曰曩以人之奉使方外至使遐夷作逆封豕造悖  
豺狼出爪摧辱王命身幽於無人之處跡戢於胡塞之  
地歆朝露以為飲茹田鼠以為糧窮目極望不見所識  
側耳遠聽不聞人聲當此之時生不足甘死不足惡所  
以忍困彊存徒念忠義雖誘僕以隆爵厚寵萬金之利  
不以滑其慮也迫以白刃在頸鐵鎖在喉不以動其心  
也何則志定於不回期誓於致命幸賴聖明遠垂拯贖

得使入湯之禽復假羽毛刖斷之足復蒙連續每念足  
下才為世英器為時出語曰夜行被繡不足為榮況於  
家室孤滅棄在絕域衣則異制食味不均棄捐功名雖  
尚視息與亡無異向使君服節死難書功竹帛傳名千  
代茅土之封永在不朽不亦休哉嗟乎李卿事已去矣  
失之毫釐差之千里將復何言所貺重遺義當順承本  
為一體今為異俗余歸漢室子留彼國臣無境外之交  
故不當受乖離邈矣相見未期國別俗殊死生隔絕代

馬越鳥能不依依謹奉答報竝還所贈 李陵重報書

曰子卿足下勤宣令德策名清時榮問休暢幸甚幸甚  
遠托異國昔人所悲望風懷想能不依依自從初降以  
至今日身之困窮獨坐愁苦終日無覩但見異類韋韝  
毳幘以御風雨羶肉酪漿以充飢渴舉目言笑誰與為  
歡涼秋九月塞外草衰夜不能寐側耳遠聽胡笳互動  
牧馬悲鳴吟嘯成羣邊聲四起晨坐聽之不覺淚下與  
子別後益復無聊身負國恩為世所悲子歸受榮我留



受辱命也何如身出禮義之鄉而入無知之俗每一念  
至忽然忘生陵不難刺心以自明刎頸以見志顧國家  
與我已矣殺身無益適足增羞左右之人見陵如此為  
不入耳之歡來相勸勉異方之樂祇令人悲增忉怛爾  
子卿視陵豈偷生之士而惜死之人哉誠以虛死不如  
立節滅名不如報德也昔范蠡不殉會稽之恥曹沫不  
死三敗之辱卒復句踐之讐報魯國之羞區區之心竊  
慕此耳足下又云漢於功臣不薄子為漢臣安得不云

爾乎足下昔以單車之使適萬乘之虜丁年奉使皓首  
而歸老母終堂生妻去幃此天下所希聞古今所未有  
聞子之歸賜不過二百萬位不過典屬國子尚如此陵  
復何望哉且漢厚誅陵以不死薄賞子以守節欲使遠  
聽之臣望風馳命此實難矣男兒生以不成名死則葬  
蠻夷中誰復能屈身稽顙還向北闕使刀筆之吏弄其  
文墨耶嗟乎子卿夫復何言相去萬里人絕路殊生為  
別世之人死為異域之鬼長與足下生死辭矣 後漢

張奐與延篤書曰唯別三年無一日之忘京師禁急不敢相聞豈不懷歸畏此簡書年老氣衰智盡謀索每有所處違宜失便北為兒車所讐中為馬循所困真欲入三泉之下復鎮之以大石厄乎此時也且太陰之地冰厚三尺木皮三寸風寒慘冽剥肌傷骨但此自非老憊者所堪而復加之以師旅因之以飢饉衆難聚集不可一二言也聾盲目甚氣力寢衰神耶當復相見者從此辭矣 晉趙景真與嵇茂齊書曰昔李叟入秦及闕而

歎梁生適越登岳長謠夫以嘉遯之舉猶懷戀恨況乎  
不得已者哉惟別之後離羣獨遊背榮宴辭倫好經迴  
路造沙漠鳴鷄戒旦則飄爾晨征日薄西山則馬首靡  
託或乃迴颺狂厲白日寢光崎嶇交錯陵隰相望涉澤  
求蹊披榛覓路嘯詠溝渠良不可度斯亦行路之艱難  
然非吾心之所懼也又北土之性難以託根投人夜光  
鮮不按劍今將植橘柚於元朔蒂華藕於脩林表龍章  
於裸壤奏韶武於聾俗固難以取貴矣朝霞啟暉則身

疲於邁征太陽戢曜則情劬於夕惕思躡雲梯橫奮八  
極披艱埽穢蕩海夷岳蹴崑崙使西倒蹋泰山令東覆  
平滌九區恢廓宇宙斯亦吾心之鄙願也時不吾與垂  
翼遠逝鋒鉅靡加六駟摧屈自非樂天知命誰能不憤  
悒者哉吾子植根芳苑擢秀清流榮耀眩其前豔色餌  
其後良儔交其左聲名馳其右翱翔倫黨之間弄姿惟  
房之裏從容顧盼綽有餘裕俯仰吟嘯自以為得志矣  
豈能與吾同大丈夫之憂樂哉去矣嵇生永離隔矣

帆飄寄臨沙漠矣悠悠三千路難涉矣執手之期邈無  
日矣思心彌結誰云釋矣無金玉爾音而有遐心身雖  
吳越意存斷金 嵇茂齊答趙景真書曰登山遠望觀  
嶠嶮以成憤策杖廣澤瞻長波以增悲遊盼春園情有  
秋林之悴濯足夏流心懷冬冰之慘對榮宴而不樂臨  
清觴而無歡今足下琬琰之璞未剖而求光時之價騏  
驥之足未攄而希絕景之功心銳而動淺望速而應遲  
故有企佇之懷爾夫處靜不悶古人所貴窮而不濫君

子之美故顏生居陋不改其樂孔父困陳絃歌不廢幸  
吾子思弘遠理含道自榮將與足下交伯成於窮野結  
箕山於蓬屋侶范生於海濱倚黃綺於商岳憑青雲以  
絕馳遊曠蕩以自足雖不齊足下之所樂亦吾心之所  
願也 梁簡文帝與劉孝綽書曰執別灞柁嗣音阻闊  
合璧不停旋灰屢徙玉霜夜下旅雁晨飛想涼燠得宜  
時候無爽既官寺務煩簿領殷湊等張釋之條理同于  
公之明察雕龍之才本傳靈蛇之譽自高頗得暇逸於

篇章從容於文諷頃擁旄西邁載離寒暑曉河未落拂  
桂棹而先征夕鳥歸林懸孤帆而未息足使邊心憤薄  
鄉思遭迴但離濶已久載勞寤寐佇聞還驛以慰相思

又與蕭臨川書曰零雨送秋輕寒迎節江楓晚落林  
葉初黃登舟已積殊足勞止解維金闕定在何日八區  
內侍厭直御史之廬九棘外府且息官曹之務應分竹  
南川剖符千里但黑水初旋未申十千之飲桂宮既啟  
復乖雙闕之宴文雅縱橫即事分阻清夜西園眇然未



尅想征艫而結歎望挂席而霑衿若使弘農書疏脫還  
鄴下河南口占儻歸鄉里必遲青泥之封且覲朱明之  
詩白雲在天蒼波無極瞻言歧路眷慨良深愛護波潮  
敬勗光彩 元帝與蕭挹書曰闊別清顏忽焉已久未  
復音信勞望情深暑氣方隆恒保清善握蘭雲閣解綬  
龍樓允因妙選良為幸甚想同僚多士方駕連曹雅步  
南宮容與自玩士衡已後唯在茲日唯昆與季文藻相  
輝二陸三張豈獨擅美比暇日無事時復含毫頗有賦

詩別當相簡但衡巫峻極漢水悠長何時把袂共披心  
腹 劉孝標答郭峙書曰聞君子舊矣但人非豕鹿轉  
加蓬逝波駭雨散動間山川故無由交羽觴薦雜佩睨  
浮雲以搔首臨清風而浩歌變燧迴星亦云勞止 原

周王褒與周弘讓書曰嗣宗窮途楊朱岐路征蓬長逝  
流水不歸南北殊方炎涼異節木皮春厚桂樹冬榮攝  
衛惟宜動靜多豫賢兄入關敬承闕曲猶依杜陵之水  
尚報東坡之田鋤跡幽蹊銷聲窮谷何其愉樂幸甚幸

甚弟昔因多疾亟覽九仙之方晚涉世途猶懷五岳之  
舉頃年事道盡容髮衰謝芸其黃矣零落無時還念生  
涯繁憂總集視因愒日類趙孟之徂年負杖行吟同劉  
琨之積慘河陽北遊空思翬洛灞陵南望唯見長安所  
貴書生之魂還依舊里射聲之鬼無恨他鄉浮雲在天  
邈無由矣會見之期長無日矣援筆攬紙龍鍾橫集

陳周弘讓答王褒書曰甚矣悲哉此之為別也雲飛泥  
沉金鑠蘭滅玉音不嗣瑤華莫因家兄至自鎬京致來

書於窮谷故人之跡有如對面開題申紙流臉霑膝與  
弟分袂西陝言反東區雖保周陂還依蔣徑三荆離圻  
二仲不歸麋鹿為曹更多悲緒丹經在握貧病莫諧芝  
朮可求聊因採掇昔吾壯日及弟富年俱值邕熙竝歡  
衡泌南風雅操清觴妙曲弦琴促坐無乏夕晨玉瀝金  
華冀獲難老不虞一旦翻覆波瀾吾已愒陰弟非茂齒  
禽尚之契各在天涯永念生平難為胸臆正當視陰數  
箭排愁破涕人生樂爾憂戚何為願愛玉體珍金相保

期願享壽考猶冀蒼雁頽鯉時傳尺素清風朗月但寄  
相思搨管操觚聲淚俱咽 徐陵答尹義尚書別離二

國雲雨十年心想河陽言銅爵而無遠神遊漳水與金  
鳳而俱飛弟留連河北義等周南懷此殊才實可傷歎  
吾崦嵫既暮容髮鬢皤然風氣彌留砭藥無補追惟疇昔  
共備行人家國安危賓禮升降懸壺代哭俱歷春冬移  
管於箕同茲辛苦鳴蜩抱樹亟見藏冰歸雁銜蘆多歷  
寒食靖言念此如何可忘夫擁腫之木得免因於不才

穀棘之牛自保由於無用嗟余鄙陋未友龔生唯歎吾  
賢不同遽瑗爾夫推溝拯溺每切皇衷逸翮飄鱗見優  
機檻所以降尺一之書馳輶軒之使心期與國必遂還  
途寧謂親鄰更成難請伊昔梁朝共奉嘉聘張茲大帛  
處彼高閣庭奏歌鍾座延僑肸賓客之叙方於階阼田  
獵之禽同於君膳正以鄉闕阻亂致爾拘留家國隆平  
義應旋反韓宣屢至宰孔頻還翻爾遲迴豈云隣睦  
增序唐王勃春夜桑泉別少府序曰下官以窮途萬里

動脂轄以長驅王公以傾餞百壺別芳筵而促興是以  
青陽半序明月中宵離亭擁花草之芳別館積琴歌之  
思去留歡盡動息悲來惜投分之幾何恨知音之忽間  
他鄉握手自傷關塞之春異苑分襟意切悽惶之路既  
而星河漸落煙霧仍開高林靜而霜鳥飛長路曉而征  
驂動含情不拜空佇聽於南昌揮涕無言請投文於西  
候因探一字四韻成篇 又還冀州別洛下知己序曰  
東西南北某也何從寒暑陰陽時哉不與河陽古樹無

復殘花合浦寒煙空驚墜葉王生賣藥入天子之中都  
夏統乘舟屬群公之大會風煙匝地車馬如龍鐘鼓沸  
天美人似玉芳筵交映旁徵豹象之胎華饌重開直報  
蛟龍之髓季鷹之思吳命駕果為秋風伯鸞之適越登  
山以求涿水辭故友謝時人登鄂坂而迂迴入邛山而  
北走何年風月三山滄海之春何處風花一曲青溪之  
路賓鴻逐暖孤飛萬里之中仙鶴隨雲直去千年之後  
悲夫光陰難再子卿殷勤於少卿風景不殊趙北相望



於洛北駕鴛鴦雅什俱為贈別之資鸚鵡奇杯共盡忘憂  
之酒 駱賓王贈李八騎曹序曰夫人生百齡促膝是  
忘言之契丈夫四海交頤非贈別之資然而想山川之  
遠遙送歸將遠惜歲華之不待行樂無時是用輟征驂  
以少留敞離亭之多暇山芳襲吹坐疑蘭室之中水樹  
含春宛似楓江之上加以御溝新溜近入離筵賓館餘  
花遙催別酒既而滌波東注灞岍南登綠蟻空而高宴  
終金烏落而離言促雖相思有贈終結想於華滋而素

賞無睽盍申情於麗藻人為四韻各賦一言 又夏初

餞宋三少府之豐城序曰黯然銷魂者豈非生離之恨  
歟况帝里天津槐衢分黑龍之水巴陵地道楓江連白  
馬之門親友徘徊締歡言於促膝故人樽酒掩離涕於  
交頤於時晚吹吟桐疑奏別離之曲輕秋入麥似驚搖  
落之情白日將頽青山行暮想姑蘇之地夕露霑衣望  
吳會之交斷雲飄蓋嗟乎岐路是他鄉之恨溝水非明  
日之歡玉斗臨吳太阿之氣可識金陵背楚小山之路

行遙盍各賦詩式昭離緒 宋之問三月三日於灞水  
曲餞豫州杜長史別昆季序曰上巳佳遊近郊春色朱  
軒映野見東流之袂襖白雲在天愴南登之送別杜長  
史言辭灞澹將適荆河戀舊鄉之喬木藉故園之芳草  
鶴原四鳥是日分飛輿泉二龍此時云遠綠潭一望青  
山四極秦人去國乘右輔之脩途洛客思歸憶東京之  
曲水請染翰操紙即事形言各賦蘭亭之詩咸申葛陂  
之贈

贈答一

原毛詩曰無言不酬 增又曰雜佩以贈之 又曰贈

之以芍藥 又曰投我以木瓜報之以瓊琚匪報也永

以為好也 左傳遂啟疆曰朝聘有珪享頻有璋宴有

好貨殮有陪鼎入有郊勞出有贈賄禮之至也 原孫

卿子曰贈人以言重於金石珠玉勸人以言美於黼黻

文章聽人以言樂於鐘鼓琴瑟 莊子曰凡交近則相

靡以信遠則忠之以言 漢書曰古者諸侯卿大夫交

接隣國以微言相感當揖讓之時必稱詩以喻其志

贈答二

原詩序曰周公乃為詩以貽王名之曰鴟鴞焉 又尹

吉甫作頌曰其詩孔碩其風肆好以贈申伯 增家語

曰孔子遭程子於塗謂子路曰取束帛以贈先生 原

史記曰孔子適周見老子辭去老子送之曰請送子以

言 晏子曰曾子將行晏子送之曰君子贈人以軒不

如贈人以言 韓子曰鄭人有遺燕相書者謂持燭者

曰舉燭而過書舉燭燕相受書而悅之曰舉燭者高明也 穆天子傳曰穆王饗西王母於瑤池之上賦詩往來辭義可觀 增左傳曰吳季札聘於鄭見子產如舊相識與之縞帶子產獻紵衣焉 原漢書曰陳遵為河南太守既至官治私書謝京師親故數百封親疎各有意 文士傳曰漢桓麟伯父焉官至太尉麟年十二在座焉告客曰吾此子弟知有異才殊能作詩賦客乃為詩曰甘羅十二揚烏九齡昔有二子今則桓生麟即應

聲答曰邈矣甘羅超等絕倫伊彼楊烏命世稱賢嗟予  
蠢弱殊才偉年仰慙二子俯愧過言 蜀志曰馬良使

吳良謂諸葛亮曰今銜國命協睦二家幸為良介於孫  
將軍亮曰君試自為文良即為草曰寡君使掾馬良通  
聘繼好以紹昆吾豕韋之勲其人吉士荆楚之令鮮於  
造次之華而有克終之美願降心以納以慰將命權大  
悅之 增鴻書曰蜀費禕使吳孫權每別酌好酒以飲  
之視其已醉問以國事竝論當世之務辭難累至輒辭

以醉退而撰次所問事事條答無遺權以手中嘗執寶  
刀贈之禕曰臣不才何以堪明命然刀所以討不庭禁  
暴亂者也願大王勉建功業同獎漢室臣雖闇弱終不  
負東顧 原會稽典錄曰陳業少持操沛國桓儼當世  
英俊避地會稽聞業高節欲與相見終不獲後儼浮海  
南入交州臨去遺書與業曰不因行李以係山陰白樓  
日從容養高動靜履直季世多艱爰適樂土聞高風飢  
渴語言知乃深隱邈然終時求仁斯得勤而無憾齊蹤



古賢何其優哉 先賢行狀曰杜安入太學時號曰神

童時貴戚多有與書者不輒發常鑿壁藏書 荀氏家

傳曰荀勗蜀平之後遣使通吳司馬文王用公所作書

與孫皓報命和親王謂公曰君前作書使吳思順勝

十萬之衆也 增晉書曰殷羨遷為豫章太守都下人

士因其致書百餘函行次石頭皆投之水中曰沉者自

沉浮者自浮殷洪喬不為置書郵 又曰殷浩答桓溫

書慮有謬誤開開數十竟達空函 又曰王猛將行謂

慕容垂曰今當遠別何以贈我使我睹物思人垂脫佩

刀贈之

宋書曰徐湛之善於尺牘音詞流暢

齊書

曰庾易徵辟不就以文義自樂安西長史袁彖欽其風  
通書致遺易以連理几竹翹書格報之 唐書曰李光

顏字光遠葛旃少教以騎射每歎其天姿票健長從為  
裨將馬燧曰若有奇相終必光大解所佩劍贈之韓弘  
素惡光顏忠力思有以撓蠱之乃飾名姝以遺光顏曰  
公以君暴露於外恭進侍者慰君征行之勤光顏徐曰

我去室家久以為公憂誠無以報德然戰士皆棄妻子  
蹈白刃奈何獨以女色為樂為我謝公天子於光顏恩  
厚誓不與賊同生指心曰雖死不二因嗚咽泣下將卒  
數萬皆感激流涕乃厚賂使者還之於是士氣益勵賊  
悉銳士當光顏而李愬得乘虛入蔡矣 又曰秦系與  
劉長卿善以詩相贈答權德輿曰長卿自以為五言長  
城系用偏師攻之

贈答三

增疏麻

尺牘

楚詞曰折疏麻兮瑤華將以遺於離居  
謝宣遠王撫軍詩曰誰謂情可書盡

書非尺牘

一封書

三道印

韓愈寄皇甫湜詩曰敲門驚  
晝睡問報睦州吏手把一封

書上有皇甫字

盧仝茶歌曰日高丈五睡正濃將軍

扣門驚周公口云

諫議送封信白絹斜封三道印開緘

宛見諫議面手

植月團三百片

金錯刀

青玉案

張衡四愁詩曰美  
人贈我金錯刀何

以報之英瓊瑤美人贈我錦繡段何以報之  
青玉案美人贈我貂襜褕何以報之明月珠

一枝春

五雲體

陸凱寄范烜詩曰折梅逢驛使聊贈一枝春  
唐書曰韋陟常以五米賤為書記使侍妾

主之其裁答授意而已皆有楷法陟唯署名自謂  
所書陟字若五朵雲時人慕之疏邨公五雲體

雙

玉盤

雙南金

張衡四愁詩曰美人贈我翠琅玕何以  
報之雙玉盤張載擬四愁詩曰美人

遺我綵綺琴何  
以贈之雙南金

比目魚

翠鴛鴦

傅休奕四愁詩曰美人贈我明月珠

何以報之比目魚美人贈我

贈縞帶

投木瓜

上詳

蘇合香何以報之翠鴛鴦

二下詳

衡陽雁

北枝梅

黃庭堅詩曰衡陽有歸雁他日更傳音陳師

贈谷一

道詩曰此老三年別何時萬里

青泥封書

巴牋染

回更無南過雁猶見北枝梅

翰

漢記曰鄧訓故吏知訓好青泥封書從黎陽步推鹿車至上谷遺訓杜甫詩曰巴牋染翰光

過

鴈來魚

把珠懷玉

又酬韋韶州見寄詩曰深慚長者轍重得故人書雖無南過雁看取

北來魚

又詩曰久客多枉朋友書素書一月凡一束道州手札適復至紙長要自三過讀盈把那須滄海珠

入懷本倚

劉公一紙書

仙人一丸藥

晉陽秋曰劉弘為荊州刺

崑山玉

史每發手書郡國叮嚀款密莫不感悅咸曰得劉公一  
紙書賢於十部從事 文章叙錄曰杜擘與母丘儉卿  
里相親故為詩與儉求仙人  
藥一丸欲以感切儉求助也 貺遺雙鯉良佩謙光

報之七襄姑酬先辱 江頭春草目方送於燕檣 隴

首寒梅手忽披於魚素 柏臺增肅心實切於瞻烏

竹簡抒誠言莫彈於賀燕 游談所及既弗間於賢愚

妙語相先更曲蒙於契好 望夫子之仞牆莫遑躬

詣 賁孟公之尺牘獨切神馳 燕厦崇成徒劇依歸

之意 魚緘染布難形抃蹈之私 卷戀升斗之祿悵

莫埽門 飛持咫尺之書敬伸賀厦 聳聞孚號阻趨

賀於翹材 敷叙慶悰敢馳書於光範 慶君子之得

輿喜而不寐 效小人之貢牘言莫能宣 李北海求

識少陵面久切於懷 陳南陽輒遺子公書大踰所望

### 贈答四

增遺書札 古詩曰客從遠方來遺我一書札

垂尺素 岑參送竇漸入京詩曰水底鯉

魚幸無數願君別後垂尺素

飛雲翰 元稹詩曰舊好飛雲翰

贈蘭章 韋應物詩

曰蘭章 忽有贈 枉故人 韓愈寄鄂岳李大夫詩曰湓城去鄂浦風便一日耳不枉故人書無因帆

江原遺美人  
楚辭曰結微情以陳辭兮矯以遺夫美人

讀素書

古樂府曰客從

遠方來遺我雙鯉魚呼童烹鯉魚中有尺素書長跪讀素書書中竟何如上有加餐食下有長相憶

題

紙背

韓愈寄劉連州詩曰書成欲寄孔安西紙背應勞手自題

一端綺

古詩曰客從遠方來

贈我一端綺相去萬餘里故人心尚爾

雙鴛鴦

古詩曰客從遠方來贈我一端綺文綵雙鴛鴦

裁為合歡被

鶴文綾


謝惠連詩曰客從遠方來贈我鶴文綾裁為親身服著以共寢興

御定淵鑑類函卷三百二



謹案第一頁前六行歷冬夜之悠長刊本夜訛夏  
據賦彙改





總校官庶吉士臣張能照

校對官編修臣朱攸

謄錄監生臣沈元錡